


# Mipashi Yakubepaika

 Mwabuka byepi, balunda. Ke lusekelo kutanwa kuno lukeelo lunno, kabiji ne pa kwimumona anweba bonse, twaketekela mba Nkambo uji ne atweba leelo, ubena kwitupa kifutele kicheche, kyakuuba mba kechi kwikale kyuya kyabaya muno mu tabbanako pa kupwila kwa lukeelo. Kabiji pano atweba. . .

<sup>2</sup> Naketekela, mujipo baana. . . Bushe baana batwalwa mu makalasi abo, Mulongo Neville? Namona bavula balunda babacheche, kabiji Nakumya kana bapalang'anya makalasi mu—mu bifulo byabo, mu bibamba bya masukuulu a Pamulungu.

<sup>3</sup> Pano, ndombeshaipo. Amiwa njina mulanguluko mukatampe ye Nafwaijilwe kulenga bufuku bwapita, kabiji Nafwainwa kumufukula leelo. Kabiji lekai kipwilo kilombe. Amiwa njina kupwila kubena kwiya kulutwe, kujitu pa mushilwa wa Kipembe kya Kyela kya kapotwe mu Germany, nanchi ke kintu kibena kukwatang'ana pacheche. Kabiji ndombelelaiko. Kabiji nanchi, kiji, twakonsha kuntapa ponkapotu mu kibaza kikatampe kya kiliketi mu Germany, akyo Hitler kyo alengele nkondo kasa ikyangye kutatula ne, ke mpuzha ikatampe, mwikala bantu eite sauzande. Kabiji twakonsha kwikala na mafuku teeni, akutwajijilatu. Kabiji nanchi tubena kuketekela kutatula monkamwa, kabiji ne ku La Salle Lorraine, France, yalondelapo, pano ne ku Berlin, twabwela. . . Natazha mukuuba mba, Berlin pakachi ka kyokyo ne—ne France.

<sup>4</sup> Nanchi pano twabwela jibiji, inge Nkambo waswa, mu mbung'eno ya ku Chicago. Ikatatula, Nalanguluka mba, pa jabu faivi, jabu sikisi, jabu sebeni, jabu eiti, ne juba naini, ke lubaji lwami lwa mu Chicago, lwa mbung'eno pa—pa kipwilo kya Swedish. Kabiji pano baji, Mr. Boze, anweba bamo bafuma ku Chicago, baji na mbung'eno ibena kwiya yalondelapo. . . kutatula pa mutanshi Kasala kanduba, nangwa pa jitanshi ja Kainyainya, byo kiji, mu Sweden. Kabiji Nasekela bingi pa kuyumba mba bamvotajile, kuyako, kyajinga kyaitabizhiwa ku bonse kabiji kyajinga sduleendi paseti. Amiwa najinga na lusekelo pa kyokyo, bino Nafwainwa kuya konka nangwa kuno. Anweba lombai mba Nkambo atangijile ku mpuzha konka kukapuluka myeo yavula, kabiji buwame bukobiwa mu Bufumu bwa Lesa. Pano, baji na mbung'eno kokwa, kabiji—kabiji ne mu Sweden, kabiji baambile mba tukekala na tweti-faivi, sate-faivi sauzande bantu bakutatwilapo, ponka pa mbung'eno, kabiji bavula ba mwiabo ke bantu babula kupuluka.

<sup>5</sup> Kabiji momwa mu Germany, kyawama, baji na kibaza kiji na pakwikala eite sauzande. Mambo, atweba, mu Switzerland ako kotwafuma, twajinga na mbung'eno yawama bingi kokwa, kabiji kape bavula mwi anweba kechi mwakyumvwapo kyokyo ne. Aye Nkambo witupesheshe bingi na bulume, twajinga na ba kwitabila fifite sauzande mu mafuku atanu, ku—ku—ku Zurich, Switzerlanda.

<sup>6</sup> Kabiji nanchi, Mulongo Jack Shuler, anweba bavula mwamuyuka, ke wa ku Methodist, nsongwalume wakwa Bob Shuler wakala. Baji mu Belfast pakino kimye, kabiji—kabiji babena kwamba mba mpuzha beyalula, na mambo a Mamboawama, kabiji kyakila ne byajinga mbung'eno yakwa Billy Graham. Jack ke mulongo mwanyike wawama bingi, uji na lupata ne butemwe. Kabiji aye—aye uji bingi na bukishika pa kikye poso Naketekela mba aye ke kalume mukatampe wa Nkambo. Kabiji lombelelaiko Mulongo Shuler. Kabiji—kabiji ye Jack Shuler, ne Jack MacArthur uji naji. Mulongo Jack MacArthur ke musapwishi mukatampe, ne aye. Kabiji koka bena kipwilo babena kwamba mba ke kusangululwa kukatampe bingi kwamwekapo mu Ireland. Nanchi tuji... Balombeshaingapo pa juba pa juba boba—boba banabalume. Bonse babiji banabalume banyike, mushi, pepi nobe foote, Naketekela, nangwa baji mushi, bisemi kabiji ne bikwabotu, kabiji ke basapwishi baimana bulongo na Mamboawama, kabiji twibatemwa.

<sup>7</sup> Kabiji pano, Na—Nalomba mba anweba kechi musakundubako ne, amba—mba Lesa usa kuleka fukule mulanguluko ponka pano. Kuji bimye bimo byo wakonsha kukakalwa kuyuka kwakwalulukila. Bushe mwafikapo pantu pa byo byo nyi? Naketekela mba Paulo wafikile mu kyokya kifulo kimye kimo, kechi ibyo nenyi? Kyajinga pakachi ka mashinda abiji. Kabiji kimye kyon ayilengakonka, kika, aye wamwene Malaika mu kimonwa wamubujile mba “Iya kuno ku Macedonia.” Nanchi Nkambo ukijitu na Malaika Wanji, kechi iji Nanji nenyi? Inge Nakonsha kwikala wikepesha mu muchima wami nobe byonka byajinga Paulo.

<sup>8</sup> Kabiji pano, bufuku buno, vulukai mpwijilo ya Mamboawama kuno pa tabbanako, muntu yense eye. Anweba mwazhokoloka Louisville, Amiwa kambanga ku Kipwilo kya Kibelo kya Shikuka, bufuku buno, pa maawala avula, pa sebeni-sate kufika ne pa naini-sate, pa Mulongo Cauble. Nafwajilwe kwiya jibiji kuno. Kabiji bino ke muntu wawama bingi, kabiji wajikungita. Kabiji Mulongo Cauble, ke mwanamulume wawama bingi, mulongo. Anweba, Naketekela mba mwamuyuka, mulongo wawama bingi, kabiji kyajinga kyakosa pakuuba mba namukainetu byonkabya. Lombai. Kyakila pa bintu byonse, lombi, kabiji lombai mba Lesa usakwitupa wa—wawama mulanguluko.

<sup>9</sup> Pano, kasa tukyangye kutatula Mbila Ya Mamboawama, tuji na lukeelo lwakupesha baana. Kabiji Njina mulunda mucheche muno mu kupesha, ne aye, kwi Nkambo. Bino, bimye byavula mu bipwilo byavula . . .

Mwakonsha kung’umvwatu bulongo nyi, kunyuma kwine? Inge mwakonsha, kijitu bulongo nyi? Ao mafani kuno, Amiwa ngubatu, kechi wakonsha kwiteleka obewa mwine ne. Ine, akyo, kijitu bulongo. Amiwa naakamwa kwakubula kikye Nakonsha kufwa.

<sup>10</sup> Nanchi aba—aba baana babacheche, kimye kimo bebasansa, mu kipwilo kasa baji baana babacheche. Kabiji, nangwa byonkabyo, akyo kyafumine ku kipwilo kya Katolika, kwibalengela kwikala bena kilishitu baana babacheche, nangwa “kwi babatizha” byo bekitela bino kasa bajitu balongo banyike bacheche. Kipwilo kya Methodist kyalupukile nakyo, kya lubatizhilo lwa banyike, ne bavula, kabiji Nalanguluka mba ne byavulatu. Naketekela mba akyo lo lupusano luji pakachi ka ba Nazarene kabiji ne musango-wakala waki Methodist, ke kya lupusano lwa lubtizhilo lwa baana, kabiji ne akwabo mabano ne bikwabotu. Bino, mu jishinda jiji jonse, kechi kiji, Naketekela mba kechi kiji na lukatazho lwabaya ne. Mambo, nangwa byonkabyo, Naketekela mba Kalvali wapwishishe byonsetu, ponkapa, pa byonse bye, abyo ibyo, mambo Yesu wafwile popa na kupulusha baana babacheche ne kupulusha ntanda.

<sup>11</sup> Kabiji mwaana mucheche, nangwatu bainanji bekale bamusango ka, ba bubi byepi, akyo kechi kyakonsha kuleta lupusano ne, mambo Mashi akwa Yesu Kilishitu amutokessa, monai, awe ye Mwanamukoko wa Lesa ufumya bubi bwa pano pantanda. Awa mwaana kechi wakonsha kulapila ne. Kechi wayuka kulapila ne. Kechi ujipo na kilumbululo kya kwikela pano ne, buke bwaji. Kechi wakonsha kwimubula kyo aikajila pano ne. Pakuuba Lesa ye wamutumine pano, kabiji Mashi a kwa Yesu Kilishitu amutokessa pa kyonka kimye kyakwiya pantanda. Kabiji wikala poso wakumanya myaka ya kuyuka byawama ne byatama, nishi wayuka kyatama ne kyawama, kabiji kufuma popo kyonse kyo oba wafwainwa kulapila pa kintu byo ayuka mba kyatama. Abyo ibyo. Nanchi, bamo bebasasa, kabiji balanguluka mba kechi baya Mwiulu ne.

<sup>12</sup> Kabiji kuji lufunjisho lwambiwa mba inge mwaana wasemwa ku basemi baji na Mupashi Wazhila, kyawama, mwaana ukaya Mwiulu; bino, inge kechi byokiji ne, kafwapo kintu kikwabo kijipo pa kikye ne, mwaana kafwako kyo aji nakyo ne. Akyo ke kilubo kyabaya. Ing’anyi lupusano lujipo nangwa basemi bekale na Mupashi Wazhila? Ke musango wa lusako lwa masongola, kabiji ne mwaana naye usemekwa mu musangotu umo. Nanchi, kyo kyoka “wasemekejilwe mu bubi, waimichijilwe mu bubi, ne kwiya pantanda kasa amba bubela.” Akyo, amo mo mwaila Binembelo.

<sup>13</sup> Nanchi, kabiji nanchi Mashi akwa Yesu Kilishitu amutokesha ne kulenga mfuto ya mambo ya yewa mwaana. Inge wafwa, wafwainwa kuya mu Kyeenyi kya Lesa, nangwatu inge wasemekwa kufuma ku beene basemi bandengamambo muntanda, poso wafika pa kimye kya kuyuka bintu byawama ne byatama. Kabiji pano byo kyuba, kufuma ku kyokya kimye, wafwainwa kulekelwa mambo. Wafwainwa kwipuzha lulapilo lwanji aye mwine kufuma pakyokya kimye. Bino kimye kyo akiji mwaana mucheche. . .

<sup>14</sup> Bino, jishinda jo tweseka kulondela, kuno ku tabbanako. Kyo kyonka kifulo mu ntanda Amiwa nkongya, ko Nsapwila Lufunjisho, ke pano pa tabbanako, mambo kino kyo kipwilo kyetu. Kabiji tusapwila Lufunjisho kuno pakuuba mba twalama bantu mundonda. Bantu bakwabo, mu bipwilo byabo, basapwila kyonse kyo baketekela. Kabiji abo ke balongo bami, nangwa twakonsha kupusana pacheche, bino twi balongo na balongo pamotu. Kabiji, bino kuno mu tabbanako, tusapwila kyo twalanguluka mba Lufunjisho lwa mu Binembelo. Kabiji, moomwa, twamona kupesha kwa baana, kyo twatela mba kupesha, kimyetu kimo mu Baibolo kyo twakonsha kutaana, nangwa apo mu Lulayang'ano Lupya baana babacheche po bajinga na kintu kimo kya kuuba, nangwa Kilishitu po ajinga na kya kuuba na kyokyo kiila, kyajinga, Aye byo ebalamine mu maboko Anji ne kubika maboko Anji pe abo kabiji ne kwibapesha, kabiji waambile mba, "Lekai baana babacheche beye kwi Amiwa. Ne kwibakanya ne, mambo Bufumu bwa Lesa bo bwabo."

<sup>15</sup> Pano, twashilwa, byo twayuka, kutwajijila na mwingilo Aye ye aendejile na—na kufikizha. Lufu Lwanji pa Kalvali, Aye wajinga ne atweba kabiji Aye wafumine mu. . . wafumine kwi Lesa, kwiya mu ntanda, wabwelele kwi Lesa, nangwa kufuma pantanda kuya kwi Lesa, ne kwiya jibiji mu musango wa Mupashi Wazhila, kabiji uji ne atweba, mwi atweba, kufikatu ne kupelo ya natanda, na kwingila mwingilo umu mu Kipwilo Kyanji yenka ye Aubilepo kimye kyo Ajinga pantanda. Kabiji, pa kyokyo, tusenda baana betu umu ku mukwabo, ku bamwingilo, kabiji bebalombelela, babika maboko abo pe abo ne kwibapesha kwi Lesa. Ke kiila kichechetu kya kwamba mba twasata bitubila Nkambo ne baana babacheche.

<sup>16</sup> Pano, inge mwanobe wamucheche bamusasa meema, nangwa mujishinda jiji jonse mobobila mu kipwilo kyenu, langulukaitu. Atweba kechi twakonsha kwambapo kintu kimo kyatama pa kyokyo ne. Kijitu bulongo. Bino, mwaila Byanembwa, twatanatu pantu pamo, apo Yesu po ebapesheshe, Aye mwine. Akyo Amiwa kyo nsakutanga, Nkambo inge waswa, mu—mu Kyambo papo. Twatana mba, mu Luka Wazhila kyapitala. . . Naketekela mba ke—ke kyapitala kyabu 10, kabiji kutatwila pa veeleshi wabu 13.

*Kabiji bamuletejile baana babacheche kwi aye, pakuuba mba ebakwate: kabiji banabaji babwanga bebakanyishe aba bebaletelenga.*

*Pakuuba Yesu byo ebamwene, kechi wasekejilemo ne, kabiji wibambijile mba, Lekai baana babacheche beye kwi amiwa, ne kwibakanya ne: mambo ba bibye bufumu bwa Lesa bo bwabo.*

*Kine Nemwambila anweba mba, Yense ukabula kutambula bufumu bwa Lesa nobe mwaana wa mucheche, kechi ukatwelamo ne.*

*Kabiji wibatolele mu maboko anji, ne kubika maboko anji pe abo, kabiji ne kwibapasha wibapasheshe.*

17 Akyo kyawama? Aye waambile mba, “Pano, lekai baana babacheche beye kwi Amiwa. Kechi mwibakanye ne, mambo ba byobyoby, baji nobe baana babacheche, bo bena Bufumu bwa Lesa.” Kabiji Aye wibasendele mu maboko Anji ne kwibapasha.

18 Pano, byo twafwainwa kutemwa, lukeelo luno, inge twakonsha kwikala ne Yesu kasa aikala, mu bumuntu, kuno ku pulatifomu, ne kwamba mba, “Nkambo, Anweba mwakonsha kupesha mwanami nyi?” Oo, kika...mambo meso etu a bumuntu kabiji ne michima yetu yikebesha kumona kyokyo. Bino Aye uji pano, nangwa byonkabyo, mambo Aye witupa mwingilo wakwikyuba. Kabiji, byonka byotwauba, nanchi Aye wikitabizha. Atweba tutambulwila Boatuma, mutambulai Aye wamutumine, mwamona. Nanchi, Aye uji muno lukeelo luno. Nanchi Nyenga Gertie eye ku piyano ne kwimba lwimbo wetu wakala ye twaimbanga mu kimye kyakunyuma, awe, “Letai, letai babacheche kwi Yesu.” Naketekela uji mu buuku momwa patu pamo. Amiwa kechi naketekela ne. “Letai babacheche kwi Yesu.” Kabiji inge muji na mwaana walukeke wabulwa kupeshiwa, kabiji mubena kukeba kumupesha lukeelo luno, kika, twakonsha kwikala na lusekelo kwikyuba.

19 Bushe muji ba mwingilo mu kishimikwa, basapwishi bakonsha kukeba kwiya na kwimana pamo ne atweba kuno mu kimye kyo tubena kupesha baana kwi Nkambo? Tusakwikala na lusekelo pa kutanwa nenu, byo mubena kwiya. Kijitu bulongo, uji mu buuku kooko nyi? Obewa wa mutana, Mulongo Neville? Bushe mo aji. Kijitu bulongo, baanga bamuyuka, *Baletai Abo Mukachi*? Kijitu bulongo, twayai tumwimbe pano. Bonse pamo, kimye basemi kyo babena kuleta baana babo. Kijitu bulongo. Kijitu bulongo.

... abo mukachi, baletai abo mukachi,  
Baletai kufuma mu majimi a bubi;  
Baletai abo mukachi, baletai abo mukachi,  
Baletai balubilamo kwi Yesu.

Baletai abo mukachi, baletai abo mukachi,  
 Baletai kufuma mu majimi a bubi;  
 Baletai abo mukachi, baletai abo mukachi,  
 Baletai babacheche kwi Yesu.

Tukunyike mitwe yetu pa kakimye kacheche.

<sup>20</sup> Taata Wetu Wamwiulu, baimana kuzhokoloka kitapisho lukeelo luno ke basemi babakazhi ne babalume balama baana babo babacheche mu maboko abo, abo Anweba bo mwibapa na butemwe bwenu. Abo basata bingi pa baana, Nkambo, kabiji bebaleta kuno ku kitapisho lukeelo luno, mu nzubo yakwa Lesa, mu kwibapesha, kupana bumi bwabo kwi Anweba. Anweba mwapana. Kabiji twalomba, Lesa, amba Anweba mu kebamwena ne kupesha umo umo. Batangijilai, kabiji lekai ba Malaika ba Lesa balamawizha bebakeketelenga. Bapai bumi bwalepa bwawama kabiji bwa lusekelo. Bakemane kwikala banabalume ne banabakazhi ba kwa Lesa, ba keesha, inge kuji bu keesha.

<sup>21</sup> Lesa, twalomba mba Anweba mukemanya basapwishi ne bangauzhi kabiji ne bafunjishi kufuma mujije jibumba jazhokoloka ku kitapisho lukeelo luno. Kabiji umvwe twakota kabiji twakakalwa kuya kulutwe, muntu umo wafwainwa kwitusenda kufuma pa kifulo kimo ne kuya pakwabo, lekai tukemane ne kumvwa Mamboawama akasapwilwa nabaabo baji kuno leelo. Kiswishai kye, Nkambo. Kabiji juba jimo ja lukumo pa kupwa byonse, bumi bwetu bwapwa, abo basemi bazhokoloka kitapisho, tukekale nobe Yakoba wakala byo apesheshe bonse baana banji ne kwibabuula mpelo yabo byo ikekala mu juba jikapelako. Pano pa kutala mwiulu, waambile mba, “Mwayukatu, Amiwa nakakokoloka pamo na bantu bami.” Kabiji juba jimo ja lukumo, aye ne kisemi kyanji kyonse, bakapwilakena pamo mu Ntanda yawama. Kechi kyakukumya ne kyaambijile Balamu mba, “Lekai mpelo yami yikekale pamo nobe aye.” Lesa, Nalomba mba Anweba musakuswisha ao mapesho pa basemi.

<sup>22</sup> Kabiji pano byo tubena kuya na kubika maboko pe abo, ke—kekitu kyawama... Kabiji Anweba mwikilenga kwikala kyakwikepesha, Nkambo, amba atweba bantu ba pano pantanda twakonsha kwikala na jishuko jakupesha baana babacheche mu Jizhina Jenu, byo twayuka, mba, kyo twalomba, kyapewa kwi atweba. Byo tubena kuya na kwibapesha, lekai Yesu, awa Muntu ubula-kumweka, Umo wabulume bose imanai pepi na kupesha mwaana yense byo tubena kubika maboko etu pe abo kabiji ne kwibapana kwi Aye. Mambo twikipuzha mu Jizhina Janji. Amena.

<sup>23</sup> Mulongo Glenn Funk, uji na baana banji babacheche amba bapeshiwe kwi Nkambo. [Kafwapo bijipo pa tepu ne—Waku.]

. . .mu—mu kibamba kicheche, akwa kwalepa ku ntanda ya kukabeta ka buyeke, Anweba mwandayile yuwe mwaana kwiya. Taata, lekai mapesho Enu akokolokele pe aye.

Yosefwa, nsongwalume wami, Nakupana kwi Lesa. Kabiji lekai bumi bobo bwikale ke mapesho. Lekai obewa ukekale ngauzhi, Yosefwa. Lekai lusa lwa Lesa lwikale pe obewa. Lekai Lesa wa bashobe, aye Nkambo Yesu Kilishitu, akupeshe myaka yonse, ne kulengela bumi bobo kwikala mapesho ku bakwenu.

Mu Jizhina ja Yesu Kilishitu, Nakupesha. Amena.

<sup>24</sup> [Kafwapo bijipo pa tepu ne—Waku.] . . .mwatemwa baana babacheche? Pajipo kintu kimo pa balunda babacheche kyakuuba mba inanji yense ukeba mwananji kwikala wapeshiwa.

Pano, abyo Taata wetu Wamwiulu byo aji ne kwi atweba bakulampe lukeelo luno. Aye ukeba umo umo wa mwi atweba kwikala wapeshiwa. Aye wituleta ku kintu kimo, wikipanatu kwi atweba, nobe kwamba mba, “Kuno, Nakeba mba obewa upeshiwe, Mwaanami.” Bushe Aye kechi wawama nenyi? Nanchi twakonsha kusachila Taata Wamwiulu wa lusa muyewa musango.

<sup>25</sup> Pano, mu mapesho a baana babacheche, mwayukatu, Amiwa natangilenga mu Kinembelo juba jikwabo, pantu pamo papo, kyajinga mu Lulayang’ano Lwakala, amba, ke kintu kikatampe kyo Na—Nasachile pa kwikitanga. Kiji pano, ponkapo. “Kabiji Natanela waambile kwi Davida mba, ‘Uba byonse biji mu muchima obe, mambo Lesa uji ne obewa.’” Mwamona? “Uba kiji mu muchima obe.” Kabiji bimye byavula Na—Natana kikye, mulunda Mwinakilishitu, amba Naamba bintu kwakubula ne kuyuka kyo Nakonsha kwamba ne, kabiji nataana kuuba mba kyafikizhiwa. Kyo waamba!

<sup>26</sup> Kyaambiwe kimye kimo, Yesu waishile kufuma ku mutumba kabiji Aye wamwene kinchi kyabujile kupangapo kintu nangwa kimo ne, mabuulatu onka, kabiji kechi kwajingapo kipangwa ne, kabiji Aye waambile mba, “Kafwako muntu nangwa umo ukajako kwi obewa kufuma ku jaleelo ne.”

<sup>27</sup> Kabiji juba jalondejilepo, byo bapichilenga, batumwa bamwene mabula apumba. Aye waambile mba, “Talai kichi byo kyauma bukiji.”

<sup>28</sup> Yesu waambile mba, “Ikalai na lwitabilo mwi Lesa; mambo bintu byonse byo mukeba, inge mwalomba, ketekelai mba mwibitambula kabiji bikekala ke byenu. Kabiji bintu byonse byo mwamba, mukekala nabyo monka mo mwaambila.” Langulukai kyokyo. Oo! Kabiji kapepo leelo, Mupashi Wazhila wakwa Lesa, waimana pano pa kitapisho, mwaamba mba . . . Kyawama, kechi kyafwainwa kwikala kyo bawamisha ne. Kechi kyafwainwa kwikala kifulo kikatampe kyawamishiwa ne.

<sup>29</sup> Yakoba kimye kimo wakokele jibwe ne kubikapo mutwe wanji, kabiji ne buji leelo kyayukanyikwa mba Jibwe ja Buswanyi. Nangwa mba, Jibwe ja Buswanyi, ajo bantu bakatampe ba panopantnda basenda aja jibwe konse konse, pakuuba mba ba mamfumu baswanyikwe peulu ya jije jibwe, kasa jijitu jibwe jabula muneema ja mubujimitu.

Betele wajingatu mulumba wa mabwe atetakana pa jikwabo, kabiji jaikele ke nzubo ya kwa Lesa, kifulo kya kwikalamo. Yakoba waamba mba, “Ino kechi ke mpuzha ikwabo ne ke nzubo ya kwa Lesa.” Bino kasa ajitu mulumba wa mabwe atetakana pa jikwabo.

<sup>30</sup> Kechi kisenda bintu bya wamishiwa bulongo ne. Kisendatu kwikepesha ne lwitabilo lwa kuketekela, byo kiji. Abyo byo kyubiwa.

<sup>31</sup> Bino, byo twayuka mba kimye kibena kupwa, kechi tusakwimulama kimye kyabaya ne, byo twayuka mba kwakaba kabiji kipwilo mwayula bantu. Nanchi Amiwa nsakwamba kwi anweba pa bimye bicheche lukeelo luno, pa mutwe mucheche uno ao wafwainwa. . . Naketekela mba bisakwikala bya bukwasho kwi anweba. Kabiji pano Ami, saka kyangye kuya kunzubo, Nanembele papo bisatu nangwa bintu foolo bicheche. Naambile mba, “Amiwa kapembelela kumona Nkambo byo nakonsha kwambapo inge Nafika konka.” Nanembele pepi nobe bintu sikisi bicheche, mitwe icheche, kabiji Nanembele umo, nabika mupokochi wami bibye. Nalangulukile mba, “Kyawama, inge Nafika ku pulupiti kapepo Aye ukambula kintu kimo kya kwambapo.” Pano Amiwa jitu kwalepa nobe byo Najinga kokwa. Nanchi, nangwa byonkabyo, Amiwa nsakutanga Kinembelo papo, aye Nkambo etukwashe Kwikyumvwisha. Kyapitala kyabu 14 kya Luka Wazhila, kabiji twayai tutatwile pepi nobe pa sat- . . . veeleshi wabu 31 wa kyapitala kyabu 14 kya Luka Wazhila.

*Nangwa ng’anyi mfumu uba, byo asaka kuya na kulwa na mukwabo mfumu, ubula kwikala panshi patanshi, ne kulagulukila jimo kana ukonsha na bantu biumbi jikumi kulwa na yewa wiya na bantu biumbi makumi abiji nyi?*

*Kabiji kana ne, kasa akiji. . . kwalepa mukwabo, usa kutuma ntomensha, na kusaka mwakupwaina.*

*Nanchi byonkabyo, awa wa mwi anweba. . .*

<sup>32</sup> Nasaka kuuba mba mumone bulongo. Pano, patanshi Aye waambile mba. . . Ke kishipi. Aye waambile mba, “Pano, kuji mfumu ubena kwiya, kabiji uji na tweti sauzande bashilikale; kabiji awe mfumu ubena kwiya na kumukumanya, kabiji ujitu na bashilikale teni sauzande. Nanchi pano, kitanshi, wikala panshi ne kwipuzha kana winengezha, nangwa wakonsha kwikyuba nangwa ine.” Kijitu bulongo.



*...wa mwi anweba wabula kukana byo aji nabyo, aye  
kechi wafwainwa kwikala mwana wami wabwanga ne.  
(Mwamona?)*

<sup>33</sup> Pano lekai Nkambo abikepo mapesho Anji pa kikye Kyambo. Pano twayai tukunyike mitwe yetu pa kakimye kacheche.

<sup>34</sup> Taata Wetu Wamwiulu, Anweba Mwayuka bintu byonse, kabiji kechi munemeka bumuntu bwa muntu ne, mambo muntu ye ng'anyi Anweba ye mwanemeka? Anweba mwalengele muntu, kabiji aye ujitu pamo nobe jiluba ja mu bujimi: leelo aye walamba, keesha wachibiwako, wataiwa mu kitetengwa kya mujilo, kabiji wabwela wapumba. Kabiji Amiwa ne mulomba Anweba, Lesa, kwikala wa lusa kwi atweba leelo ne kuleka umo umo apituluke mu bumi bwanji. Atweba tuji muno mu nzubo yakololwa. Tuji pano na kufunda kabiji ne kuyuka mwakwikela, kabiji lekai kifume mu Kyambo Kyenu leelo, Anweba Lesa Wapeenape. Bavula baana Benu bapwila pamo, kabiji ne bavula baikala baana Benu pa myaka yavula, bino, byo kiji byobyoyo, atweba bonse tubwela ku nzubo yakwa Lesa, na kufunda, amba tuyuke. Kabiji Ami, kalume Wenu, na keba kuyuka byavula pe Anweba. Kabiji Nalomba mba Anweba musakuleta lutundaiko lwa Mamboawama pe atweba bonse, ne pa kalume Wenu, kabiji amba Kyeenyi Kyenu, kituntundaika mu kino kishimikwa, kisakwikala kyawama bingi, kabiji tusakulupuka muno, mu michima yetu, na kukeba kwikala bakalume Benu bawama, pakuuba mba kikale kyawaina kwi atweba kwikala muno. Anweba Lesa walusa, swishai ao mapesho mu Jizhina ja Yesu, Mwaana Wenu. Amena.

<sup>35</sup> Pano lekai Nkambo abikepo mapesho Anji pa Kyambo byotwaji kutanga. Nasaka kutola kibaba lukeelo luno, amba, "Mipashi yakubepaika nangwa Kyambo kya Lesa?" Bino, nangwa byonkabyo mutwe mwenyi, bino byokiji mba kiji mu tabbanako...Kabiji pa Kisatu bufuku bwapita...Mulungu wapwa lukeelo Naambilenga pa—pa yubili mucheche wa Mamboawama.

<sup>36</sup> Kabiji Pakisatu kyapita bufuku Nasapwijilenga pa mwanamukazhi wajinga na—na kipabi ku mutwe wanji, nangwa na...Aye wataile jali jimo ja kyela, kabiji wapyangilenga mu nzubo na kwijikeba balume banji kasa bakyangye kwiya. Kabiji kyatainwe kuuba mba awa mwanamukazhi wajinga wabooba banabakazhi bakala, kabiji aye...kabiji waimejileko Kipwilo. Kabiji kiyukilo kya masongola kechi bamvwalanga ku munwe ne. Kyamvuwajiwanga ku mutwe, kasa kiji na bibese naini bya silivwa. Kabiji umvwe mwanamukazhi waikala pite, bafumyangako kibese kimo kya silivwa akyo kyamwesheshenga mba pite. Kabiji nanchi awe mwanamukazhi wataile kibese kimo, kasa abula kwikala pite. Pakuuba mulume wanji wajinga wafumapo, kabiji waesekelenga kupelawizha na kukeba kyokya kibese, amba ekibwezheko ku kiyukilo kyanji, mambo umvwe

mulume wANJI waiya wakonsha kuyuka mba bamukwachile mu bupite, kabiji kyakonsha kulumbulula ke lwabano lwa nzubo ne bikwabotu. Kabiji Amiwa naletele kyokyo ku kipwilo pa mamineti acheche, kyataya bintu bikatampe byavula bingi. Kabiji ke kimye kya ba Taata kwiya, nanchi twafwainwa kwibikeba. Bino, kasa twayuka mu kipwilo, ne mu tabbanako wetu. . .

<sup>37</sup> Kabiji Na—Nakeba kwamba pa *Mipashi Yakubepaika*, ao wafwainwa kutelwa mba *Lufunjisho lwa pa bademona*. Muvwa byavula pa bademona, mu ano moba, bino muvwa pacheche bingi mashinda mwakufuminamo. Atweba bonse twa—twayuka mba kuji badiabola, bino, kintu kyalondelapo ke, mwakufumina mu kyokyo kintu. Kabiji pano kuji. . . Byonji, monka mu lusa lwa Lesa, naikala na jishuko jabaya ja kwingila na bibye bintu bitelwa mba bademona, ne kwibikumanya pa pulatifomu kabiji ne mu kwenda kwa pa juba pa juba, kabiji, kika, Nakonsha kutemwa kutala mu Binembelo lukeelo luno ne kutana bibye bintu byobiji.

<sup>38</sup> Bino, twibingisha mu kupwila kwa lubuko, kimye kyonse ku lubaji lwa lubuko. Kaasa, kitumbwa, kabale, timbikulosisi, byonse bye bintu kechi bilengwa na lesa ne, ke bintu bya bumupashi kabiji ne bademona. Akyo Kinembelo kyaambatu patoka. Bino abo ke bademona mu mubiji, bimena, nobe biji kaasa, uji na bumi mukachi kanji, kabiji ne bobwa bumi ke bwa demona. Kyamena pa jiso, kusalang’ana kwa timbikyulosisi, ne bikola bikwabo, ke bademona. Amo ke mu musango wa bu mubiji.

<sup>39</sup> Pano, lukeelo luno tusakwamba—tusakwamba pa bademona mu musango wa bumupashi mu mweo. Baji mu mweo byonka byo bekala mu mubiji. Kabiji twakonsha kuswa mba twibamona mu mibiji ya bantu, biji nobe kaasa ne—ne bikola bikwabo byapusana bitanwa mu mubiji wa muntu.

<sup>40</sup> Katatakatu, ne kaasa watelwa mba ke kikola kiji mu jiulu jabu-bufoolo, amba kiji mu jiulu jikwabo. Kine, ke lufunjisho lwa pa bademona. Kikola kyonse kiji mu jiulu-jabu foolo, tatwilo yakyo.

<sup>41</sup> Pano, bino kaasa mu mubiji nangwa kaasa mu mweo, demona wakonsha kwiya mu kifulo kiji kyonse. Bino, kuji bimye byavula kabiji ne bantu bavula baji na milanguluko yawama amba. . . kabiji ne bantu bawama beseka bimye byavula ku—ku kokolokela pakufunda kwa sukuulu wa mamboawama yebaji nanji, nangwa kintu kimo kyo bafunjishiwa kufumatu ku bwanyike, kabiji batanwa na kyokyo mukachi ka bumuntu bwabo, monka mu mweo wabo, amba bakiji na kintu kimo kyabula kwikala bulongo. Anweba, bavula baji muno lukeelo luno, kwakubula luzhinauko ne konse ko mwakonsha kutana Benakilishitu bapwila pamo, mutana bantu baji na yoyo mipashi

mukachi kabo, amba abo. . . Kechi kikebewa ne. Abo kechi be bakeba ne. Baamba mba, “Oo, inge Nakonsha kuleka kubepa bubela! Inge Nakonsha kulekatu lukumbwa! Inge Nakonsha kulekatu *kikye* nangwa *kyokya!*” Pano, aba ke badiabola. Kabiji, pano, beya mu musango wa bupopweshi, bimye byavula. (Byokiji ke sukuulu wa Pamulungu, ke kimye kya kufunjisha, nanchi twayai tumone kikye.) Bino, beeya mu musango wa bupopweshi, bimye byavula.

<sup>42</sup> Bino, mu Kinembelo, kimye kimo, kwajingapo muntu umo wajizhina ja Yeoshafwata, muntu mukatampe, wajinga muntu wabumpopweshi. Kabiji wayile ku mfumu mukwabo ao wajinga mfumu wa—wa Isalela. Kabiji aye, Yeoshafwata, wajinga mfumu wa Yuda. Kabiji waile kwi Ahaba, mfumu wa Isalela, kabiji bakwatakene pamo, ne kulenga lumvwang’ano umo ne mukwabo, lwa kuya na kulwa ku Lamofi Gilendi. Kabiji abo bekyubile kwakubula kulomba ne.

<sup>43</sup> Oo, inge bantu bakonsha kuvulukatu! Akyo kyo Najikwishila lukeelo luno na kulomba kuvulukwa mu milombelo byo Nkayanga kubushiya bwa tulunga. Mu bintu byonse, lombai!

Muntu umo waishile juba jikwabo ne kwaamba mba, “Mulongo Branham, bushe walanguluka mba kyatama kuuba kintu kananga nyi?”

<sup>44</sup> Naambile mba, “Kika kyo ubena kwipuzha?” Mwamona? Inge pajipo jipuzho mumilanguluko yobe, kilekaitu bunke bwakyo, kechi mwafwainwa kwikyuba ne. Ikalaitu na kyokyo. Inge mwatatula kuubapo kintu kimo, kabiji inge paji jipuzho kana kyawama nangwa kyatama, kilekaitu. Kuyamo nangwatu pacheche ne, apo wayuka mba uji bulongo.

<sup>45</sup> Bino, bintu byonse byafwainwa kulangulukwa na milombelo, patanshi. “Fundai patanshi kusakisha Bufumu bwa Lesa ne bololoke Bwanji, kabiji ne byonse byashala bikemupewa.” Amiwa nashiniinwa bingi lukeelo luno, inge banabalume ne banabakazhi bafwainwa kwikala mu kifulo akyo myeo yabo, milanguluko yabo, ngubilo yabo, byaikala bya lumbuluka ku meso akwa Lesa, akyo kyakonsha kwikala ke kipwilo kya bulume kyaikalako kala.

<sup>46</sup> Talai pa kimye kicheche ku lubaji lwa ku mubiji. Pano, atweba, tuji, bimye byavula, pa myaka yavula, tuji kitelwa mba “king’amba ng’amba kikwata bubela.” Obewa wakonsha kwikabika pa mukoko obe, ne kwikatazha ku—ku mitwe yabo, kabiji wakonsha kutwelamo ne kweseka na bulume bobo bonse kubika bubela bumvwananyike nobe bukine, kakonsha kubuulang’ana mba ke ibyo ne kimyetu kyonse, mambo a kuuba mba muntu kechi walengelwe kwikala wa kubepa ne. Bubela ke bujimbijimbi, ke kintu kyakonsa, kintu kyatama. Nakonsha ne kwikala na kitomi ne amiwa, juba jiji jonse,

kukila wabubela. Mwamona? Wabubela! Kabiji mubiji obe kechi walengejilwe kubepa bubela ne. Nangwa wikale mubi byepi, obewa ukijitu mwaana wakwa Lesa wapona. Awa muntu wakila mu bubi mu uno muzhi leelo, Lesa kechi wakebelenga mba wikale mubi ne. Aye wakebelenga obewa kwikala mwaana wamulume nangwa wamukazhi Wanji. Obewa walengwa mu kulengwa Kwanji Mwine. Bino bubi bo bwakulengela obewa kuuba kyokyo. Kabiji nangwa weseke byepi kufwanyikizha ne kweseka kulenga bubela bumweke ke bukine, baji na king'amba ng'amba kya busaayasi akyo kishinikisha mba kyatama. Obewa wakonsha kwikyamba na mwekelo ya kubula kuzhatwa, nangwa byonkabyo kikanemba mba kechi ibyo ne; mambo kuji buyuke bwabubiji buji mukachi ka muntu, kabiji abwa buyuke bwayuka kyepi kyabukine. Kabiji nangwa wambetu kyamusango ka kuno, abwa buyuke bwabubiji bwayuka mba kyabubela, kabiji kechi bikanembwa mu buyuke bwabubiji ne.

<sup>47</sup> Onkao mambo, inge mwanamulume nangwa mwanamukazhi wakonsha kutana milanguluko yabo, ne lushimuno lwabo ne bumi bwabo buji mundonda yakwa Lesa (amena) poso jishinda ja Mupashi Wazhila jaikala jalumbuluka pamo na jakwa Lesa, akyo kyakonsha kumweka! Inge mwanamulume ne mwanamukazhi baikala mundonda, kasa baji na bwanabwabene mu michima yabo, na lwitabilo lwakufuma mwine mukachi kabo!

<sup>48</sup> Bantu bavula beya ku kitapisho nakulombelelwa, kasa baji na lwitabilo lwa bumuntu. Abo besolola bubi bwabo ne kutwela mu kipwilo, kupichila mu lwitabilo lwa maana abo. Abo baketekela mu milanguluko yabo—yabo. Abo bekitabila mambo bekyumvwapo. Abo bekiketekela mambo bikiyuka mba ye mulaye wakila kuwama. Bino abyo Lesa kechi byo antalapo ne. Aye kechi utala pa lwitabilo lobe lwa bumuntu ne.

<sup>49</sup> Aye utala pa muchima, amwa monka mukachi Lesa... Kabiji umvwe kyafuma mu muchima, bintu byonse byakonsheka kubiwa. Kwisolola kobe kasambakana pamo na bumi bobo. Bumi bobo bwamba na jiji jikatampe nobe byonka byuba kwisolola nkobe.

<sup>50</sup> Pakuuba inge kwisolola nkobe kwaamba kintu kingi, kabiji ne bumi bobo bwikala kintu kikwabo, pajipo kintu kimo kyatama kuntu kumo. Ke mambo akuuba mba uji na lwitabilo lwa maana a bumuntu, kabiji kechi lwitabilo lwa kufuma mu muchima obe ne. Kabiji akya kimweshwa mba pangye, *papo*, paji maana akuyuka Lesa; bino mukachi, *munu*, ke demona wakuzhinauka. “Naketekela mu lubuko lwa Bulesa, bino kechi kyami ne.” Mwamona? “Aa, kyakonsha kwikala byonkabyo, bino kechi Nekiketekela ne.” Mwikyumvwa nyi? Pangye, mwaamba mba “ee”; mukachi, kapingu obe waamba mba “ine.” Akya kintu kya busaayasi kyakonsha kushinikisha amba kechi kiji bulngo ne, kwikishinikisha.

51 Monai pano babo ba mamfumu, kasa bakyangye kutatulako, bafwainwa kwikala na...Kasa akyangye Yeoshafwati kukwatakana pamo ne Ahaba ne, aye wafwajilwe patanshi kwamba mba, "Twayai tulombe pakuuba mba tumone biji kyaswa muchima wa Nkambo."

52 Mpai musapwishi, mpai Mwinakilishitu, mpai muka muntu ao uji Mwinakilishitu, mpai njimi, nangwa wingila ku mukinyi, ao wakonsha kubika Lesa palutwe mu bintu byonse, Nakonsha kwimumweshwa muntu ukekala na bubile nangwa diabola abike byabyepi pe aye. Aye ukeba Lesa, pantanshi. Twafwainwa kwikala patanshi. . .

53 Bino kechi be kyubile ne. Bonse bajingatu bamvwetwa na jikumbi mambo Ahaba wajinga na bufumu bukatampe bwawama, kabiji waubile bintu byavula bingi, kabiji wajinga na byanji byawama, ngolode wanji ne silivwa wanji, wajinga mukatampe, muntu wabubile, nangwa byonkabyo wajinga wabula kwitabila.

54 Kabiji apo ntanda popo iji leelo. Apo America po aimana leelo. Apo ipo bipwilo po byaimana leelo. Twashimika bipwilo bimo byakila kuwama byabulwa kushimikwapo kala. Twaikala na bafunda masukuulu bo tukyangye kwikalapo nabo kala. Twafujishiwa bimo bya masukuulu abyambo bya lesa, kabiji ne bikwabotu, kabiji twafunda kwima nobe ba Malaika, bino nangwa byonkabyo kuji kunekena kuntu kumo. Kuji kunekena, mambo balondela lufunjisho lwa muntu ne mipashi yakubepaika, mukifulo kya kubwela ku Kyambo kya Lesa. Abo beseka bintu byalondakana pamo na bya muntanda. Baeseka kubikapo kyeya kyabeka peulu yakyo, nobe Hollywood.

55 Kuno juba jikwabo, dinominesheni wayukanyikwa bingi, ba Mamboawama Onse mu Muzhi wa Kansas, nangwa, ndekelaiiko mambo, mu Denver, pa mbung'eno, babena kushimikapo kipwilo kya milyoni-dolla. Kabiji masauzande aba mishonale babena kupembelela macent fifite kufuma ku dinominesheni yenka umo, pakuuba mba batwale Mamboawama ku batunshi. Kyo tubena kukeba leelo ke milanguluko-ya bumishonale, batumwa-na Lesa, kusangululwa kwa kusemwa-na Mupashi-Wazhila, kyakuuba mba bonse baji na kizaku kya kwa Lesa, kuya mu musaka momwa na kubilapo Lesa kintu kimo, mukifulo kya kushimika kyabaya, bipwilo byawama ne kweseka kushinda bomwalamakana nabo.

56 Nakonsha kutemwa kupopwela mu mishonyi, amo mwapyangwa bulongo, nangwa mu kikulwa kya binyu, kabiji ne kwikala na kukasuluka kwa Mupashi Wazhila kabiji ne butemwe bwa Lesa bubena kupya mu michima, kukila kwikala mu kafindulo mukatampe yetuji nanji mu ntanda bino kasa byayuzhiwamo na mafunjisho a bantu ne mafunjisho a bipwilo.

Kyo tubena kukeba leelo ke kusangululwa kwakusukena, kubwela ku Bukine, bwelai ku Kyambo kya Lesa jibiji.

<sup>57</sup> Bino, byo baile kokwa, kabiji kyajinga pakupitapo ka kimye Yeoshafwata wibwelelemo ayemwine ne kwamba mba, “Bushe kechi . . . Kyawama, twayai tumwipuzhe Nkambo pa kikye.”

<sup>58</sup> Aye waambile mba, “Kijitu bulongo,” Ahaba wikyubile, kabiji watumenye na kusenda aduleendi, foolo aduleendi basapwishi bafunjishiwa. Kabiji wibaletele kokwa ne kwamba mba, “Abo bonse bakwaula.”

<sup>59</sup> Kabiji nanchi batwelele mu bya kusazawila kwabo, kabiji batatwile kwita. Kabiji baambile mba, “Ee, yainga mu mutende. Aye Nkambo uji nenu.”

<sup>60</sup> Kabiji panyuma aba foolo aduleendi bapana bukamonyi amba yainga mu mutende, nangwa byonkabyo Yeoshafwata wayukile . . . Mwikyumvwa nyi? Monai, mukachi ka muchima wa yewa muntu waoloka mwajingapo kintu kimo kyamwambijile mba paji kyabubela pa nsulo pamo. Kintu kimo kyatamine.

<sup>61</sup> Ahaba waambile mba, “Pano tuji na foolo aduleendi kuno, kabiji na bu umo, bonse ba mwiabo baamba mba, ‘Yainga, Nkambo uji nenu.’”

Bino Yeoshafwata waambile mba, “Bushe kechi kujipo umo nenyi?”

<sup>62</sup> Aye waambile mba, “Kyawama, kika kyo tubena kukeba na yeo umo mukwabo, panyuma ya kwikala na banabalume foolo aduleendi bafunda bulongo mu kyaalo? Abo bonse baamba mba ‘Yainga!’” Aa ajinga maana a bumuntu. Bino mukachi ka muchima wa Yeoshafwata wayukile mba pajipo kintu kimo kyatama. Pano, aye waambile mba, “Tuji na umo, aye ke Mikaya. Bino Namushikwa.” Waambile mba, “Aye kimye kyonse wambatu bintu byatama, ne kutwela ponse pa bula mingilo yanji, kabiji ubena kukundula bipwilo ne bintu byonse.” Waambile mba, “Namushikwa.”

Waambile mba, “Yainga, kamumonai, kabiji tumone kyo asakwamba.”

<sup>63</sup> Kabiji Mikaya byo aishile, aye waambile mba . . . Abo baambile mba, “Pano, talai, wambe bimo byaamba bonse bashala.”

<sup>64</sup> Aye waambile mba, aye waambile mba, “Amiwa sakubatu . . .” Kiji bino. “Amiwa nsakwambatu kyaamba Lesa.” Amena. “Kechi oene mambo ne nangwa ngauzhi wenu waamba, kabiji *yuwe* byo aamba, kabiji ne byaamba kipwilo kyenu, kabiji ne byo baamba, Amiwa nsakwamba byaamba Lesa. Lesa wambikile pa mivumbo yami kabiji Amiwa nkambatu Aye byo aamba.” Kyo tubena kukeba leelo ke ba Mikaya bakwabo abo bakamba byaambile Lesa. Monai, nanchi abo bamutaine kokwa, kabiji aye waambile mba, “Mpai bufuku buno.” Nanchi

abwa bufuku Nkambo wamukumenye, kabiji wabwelele jibiji lukeelo lwalondejilepo. Kimye ba mamfumu babiji byo baikela pa kibelo kyasakwa, aye waambile mba, “Yaingatu.” Waambile mba, “Yaingatu. Bino,” waambile mba, “Najikumona Isalela nobe mikoko ya palang’enamo yabula kafunga.”

<sup>65</sup> Nanchi awe musapwishi umo, bonse bamvwala, bayile na kumupuma pa kanwa, ne kwamba mba, “Jishinda jepi Mupashi wa kwa Lesa jo Ayilemo kufuma kwi amiwa?”

Waambile mba, “Obewa ukayuka kimye kyo tukabwela jibiji.” Ee.

<sup>66</sup> Aye waambile mba, “Telekai kuno!” Aye waambile mba, “Atweba twi bakalume bakwa Lesa. Atweba tuji foolo aduleendi, bino obewa uji bunke.”

<sup>67</sup> Bino Mikaya waambile mba, “Amiwa nsakwimubuula paji lukatazho.” Amena! Waambile mba, “Namwene kimwesho.” Amena! Aye waambile mba, “Kabiji Namwene Lesa nsaaikala pa jitanda Janji. Namwene mazhita a Mwiulu kasa aimana Nanji. Kabiji twayuka mba Kyambo kya Lesa kyaamba mafingo pa yuwe muntu, monka mwaila byo auba.”

<sup>68</sup> Kuuba wapesha akya Lesa kyo ayinga ne, nangwa diabola kechi wakonsha kufinga akya kyo apesha Lesa ne. Ke kintu kya pa muntu bunke bwanji, nagwatu ekale kamulanda byepi nangwa ekale wakosama, wabula kuyuka bintu, wabula kufunda. Akya kyo apesha Lesa kyapeshiwa. Akya kyo ayinga Lesa kyayingwa. Yukai kwabanya kyaoloka ne kyabula kuloka.

<sup>69</sup> Mikaya wayukile bingi bulongo amba awa kechi wajinga Nkambo wajinga mu booba basapwishi ne. Kyawama, lukatazho ka lwajinga na babo basapwishi? Monai byo baubile. Bamvwajile byakila mu kuwama. Bebanjishishenga kajo kakila mukuwama. Baishilenga pamo na bijilo byabo ne bikwabotu, kabiji ne kukwatankana kwabo, poso kyafika pakifulo kyakuyukatu bya mafunjisho a ku masukuulu a mamboawama. Kabiji Baibolo waamba mba Mikaya, byo amwenenga pa kimwesho, aye waambile mba, “Lesa wajikwamba mba, ‘Ing’anyi ye tusakutuma mba ayeko na kujimbaika Ahaba?’ Kabiji mupashi wabubela waambile mba, ‘Amiwa nsakuya konka na kubepaika Ahaba kupichila mu boba basapwishi, bamulengele Ahaba kuyako, pakuuba mba Kyambo kya Lesa kifikizhiwe.’”

<sup>70</sup> Bino, leelo bavula bantu babena kuteleka. . . (Pano, sukuulu wa Pamulungu, Namutemwa.) Talai, bantu bavula babena kuteleka ku mipashi yakubepaika mu kifulo kya kutambula Kyambo kya Lesa. Mipashi, iji mwaya ntanda. Bo bademona. Kabiji baya mu mampuzha na kutwela mu bantu, bamwingilo. Batwela mu bamembala ba kipwilo. Batwela ne bantu bawama. Kabiji ne kwibalengela kutwela, mu kyakwibalubakanya. Kabiji baamba bintu, ne kuuba bintu, ne kufunjisha bintu, kabiji ne kupituluka mu bintu, byapusana na Kyambo kya Lesa. Leelo,

bamwingilo ba mu bipwilo byabo babena kuswisha bantu baabo kukaya ngyuka mu bipwilo, bavulatu mwi abo. Bino, kechi bonkatu ba Katolika ne, kuji bavula ba Polotesitati booba byobyo.

<sup>71</sup> Kyo bauba ke kupingakenyamo kintu kingi. Baeseka kuleta lunengezho lupyaa. Baeseka kusenda jishinda ja kufunda, kupingakenya mu kifulo kya Mupashi Wazhila. Anweba kechi mu kekyuba ne, nangwa muntu wenu ekale wafunda byepi. Naketekela mba ke kintu kyawama aye kwikala wafunda. Bino inge kechi uji na Mupashi Wazhila na kyokya ne, kufunda kwanji kechi kukamuletela byawama ne. Kufunda kechi kukasenda kifulo kya butangi bwa Mupashi Wazhila ne. Amena.

<sup>72</sup> Monai, abo, mukifulo kya Kikye, abo baeseka kuletamo kupakana na maboko kupingakenya mu musango-wakala ye twaikalanga nanji. Leelo kipwilo kyaalukatu ke kipya. Benda na kupana kuboko kwabo kwa kilujo kwa lumvwang'ano lwa bupopweshi, kabiji akyo kyayila mo bobila bintu. Bino kechi kikasenda kifulo kya musango-wakala wakujila apo bandengamambo po baitwanga amba bekale bulongo na Lesa. Abyo ibyo.

<sup>73</sup> Leelo babena kweseka kutola kifulo kya bya bujikumi bya Lesa. Abo babena kukeba kubilamo kintu kikwabo. Abo babena kweseka kwikyubila mwapusanako ne. Baya na kwikala na bisela mu bipwilo, bakaya byakubekya. Byakubekya kechi bikasenda kifulo kya bujikumi kya Lesa ne. Bijilo bya mulajilo, kupotesha myemba, mwakumwena mali akupana ku makongole, kechi kikasenda kifulo kya Lesa kya bujikumi wa Peenape ne kya bupe ne. Kechi kikobiwa ne. Bino nangwa byonkabyo tubena kweseka kwikyuba.

<sup>74</sup> Kyokika? Ke mipashi yakubepaika ibena kwiya, na kweseka- . . . kupingakenyamo kintu kingi mu Kyambo kya Lesa. Lesa kechi ujipo na kyakupingakenyamo mu Kyambo Kyanji ne. Akyo kyaikala Peenape ne myaka yonse. Lesa kechi ujipo na kya kupingakenyamo mu lwitabilo ne. Lwitabilo kechi lujipo na kyakupingakenyamo ne. Luketekelo kechi lwakonsha kusenda kifulo kya lwitabilo ne. Lwitabilo lujitu pa bunke. Lwaimanatu pa bunke. Kechi kikasenda ki . . . Luketekelo kechi lwakonsha kutola kifulo kyakyo ne. Luketekelo ke bintu byaketekelwa kumweka, bukamonyi bwa bintu bibula kumweka ne, nangwa lwitabilo byobyo luji, byonkabyo. Mwamona? Luketekelo ke kintu kimo; lwitabilo ke kintu kikwabo. Luketekelo luketekela kyokyo; lwitabilo lwatambula. Lumo ke lwitabilo lwa bumuntu; kabiji lukwabo ke lumwekesho lwa Lesa. Kechi kikasenda kifulo kyakyo ne. Tubena kweseka, bino tubena kupingakenyamo byonse bye bintu.

<sup>75</sup> Tubena kukeba kushimika bipwilo bikatampe mu kifulo kya kutuma mishonale. Kikwabo kyapingakenamo. Yesu



kechi watongwelepo muntu amba ashimike kipwilo ne. Kechi kyabikilweko mu Baibolo ne. Twabikako masukuulu, baleka kyokyo kyasenda kifulo kya bu mishonali. Atweba . . . Yesu kechi witubujilepo kushimika sukuulu wa mamboawama ne. Byonse bijitu bulongo. Kufunda, kweseka kusenda kyokyo mu kifulo kyakyo. Kechi kikekyuba ne. Yesu kutumanya kwanji kwajinga “yainga pano pantanda ponse na kusapwila Mamboawama ku kilengwa kyonse,” kufika ne ku mpelo. Nanchi byonse byo twapingakenyamo kechi bikasenda kifulo kya kintu kitutulu ne.

<sup>76</sup> Juba jikwabo Najinga na kyakupitamo, kyapingakenamo. Najinga na wamukanwa mutanshi, nayokwele jino. Lukeelo luno Najinga na jino jabubela jaimana ponka. Amiwa kechi nakonsha kwamba nangwa pacheche ne. Kechi kikasenda kifulo kya kine kintu ne. Ine, mwane! Oo, ami!

<sup>77</sup> Mwakonsha kutola muntu ne ku muvwika, mwamulenga wakichi, choko, nangwa kyonse kyo musaka, ne kumwimika bulongo kikupu. Aye kechi uji na byakumvwa ku mubiji ne, kafwako kapingu ne. Aye kechi ukasenda kifulo kya muntu mwine ne. Nangwa kwaluluka kwabubela kwiya ne kwamba mba, “Natwela mu kipwilo. Amiwa keseka kuuba bulongo.” Kechi kikasenda kifulo kya musango-wakala ne, watumwa na-Lesa, kwaluluka kwa Mupashi Wazhila akyo kilengela muntu kwikala wapusanako mu muchima wanji. Kechi kyakonsheka kubiwa ne, mambo kechi mujipo Bumi mukachi kakyo ne. Kechi pajipo kintu kimo kya kumupa Bumi ne.

<sup>78</sup> Kuno kechi papita kimye kyabaya ne Namwene sendwe ubasa byakubasa waletele kikye, sendwe ubasa, Natazha mu kuuba mba, walengele kikye kipikichala kya kwa Mosesa. Kechi nakonsha kumutela jizhina janji ne. Aye ke sendwe mu Ngiliki. Aye kyamusendejile bumi bwanji. Kabiji byo afikile pakulanguluka mba kyalumbuluka bingi, aye waikele bingi nalusekelo pa kipasha kyakwa Mosesa, nanchi waimbile ku jinungo jakyo, ne kwamba mba, “Amba, Mosesa!” Kyamwekele nobe kyakine! Kyajinga kyapashang’ana bingi bulongo poso ke kimweke nobe Mosesa, mwayijile milanguluko yanji, wikipumine na nsando pakuuba mba kyumvwe kutata.

<sup>79</sup> Ubika mu milanguluko ya kipwilo. Nangwa upingakenyepo bintu bingi byepi, nangwa kipwilo kikale kyabya byepi, nangwa mwimbe bulongo nyimbo byepi, nangwa kipwilo kyenu kimvwale byepi, nangwa mwikale na *kikye*, *kyokya*, nangwa *kikwabo*, mwakonsha kwikipuma, mba umvwa, musango uji yense. Kechi kikasenda kifulo kya Bumi ne, kanatu Kilishitu waikila mu musango wa Mupashi Wazhila, mu kyokya kipwilo, kabiji wikipa kyakupitamo kya kusemwa jibiji. Kechi kikasenda kifulo kya Kyambo kya Lesa ne. Kyambo kya Lesa kyaimanatu pa bunke.

<sup>80</sup> Mikaya wajinga na Kyambo. Aye wayukile mba uji na Kyambo. Aye wajinga na Kyambo kyanembwa, aye waji Nakyo monka mu kimwesho. Aye wayukile byaambile Lesa mu Kyambo Kyanji. Aye wayukile byaambile Lesa kupichila mu kimwesho. Byonse bibiji byaishile pamo. Aye wayukile mba kya Bukine, okao mambo kechi wajingapo na moyo ne.

<sup>81</sup> Bino iye mipashi yakubepaika, monai byo yauba, leelo. Pakuuba mba balenge ba membala ba kipwilo bavula, ne kulengamo bamembala ba kipwilo bawama, banekenya bintu byonse bya mu musango-wakala wa lufunjisho lwa Mupashi Wazhila. Kyaswishishe bantu kwikala na bijilo bya makayo umo na mukwabo, mu bibamba bya kukailamo bisela. Akyo kechi kyakonsha kupingakenyapo nzubo ya peulu ne, apo po balombelenga Mupashi Wazhila. Kyaswishishe banabakazhi kwiya pamo na kwamba bisela byamakayo, kabiji ne kwikala byavula byatutu byabulamo bukwasho. Akyo kechi kikasenda kifulo kya milombelo ne. Banabakazhi, byo baya na kuvwala leelo, ke—ke kyabuvu.

<sup>82</sup> Naumvwine kintu kimo akyo Mulongo Neville kyo aambile, waambile mba, “Bakamulanda bantu bena America,” amba, “batuma byakumvwala byabo ku bunshiya bwatulunga.” Abyo ibyo. Babena kwenda na bya kumvwala bya mukachi. Abo. . . Abyo ibyo. Bafwanyijilwe kwibipana ku bamishonyi, mambo bamishonali. . . Bantu ne batunshi mu byaalo bikwabo babena kwibimvwala. Abo bantu baikala kwakubulabyo, kyamweka nobe bekitemwa.

<sup>83</sup> Nsakwimubuula, pajipo kintu kimo kyatwalwa mungi, ne kyokyo ke kusapwila kwa Mamboawama akwa Nkambo Yesu Kilishitu. Ke bademona be muvuula bya kuvwala byenu. Kwajingatu muntu umo mu Baibolo watabawile byakumvwala byanji, ao ke muntu wajinga na bademona. Kabiji jaleelo waiya mu musango wapipulwako, nobe mwaila bisaka bantu, nobe kyawama, nobe kijitu bulongo. “Ke kimye kya lubesha watalala, kabiji kyakonsha kukulengela kumwisha kutalala inge wavuula bya kuvwala byobe.” Mwanamulume kwendauka kuku-ne-kuku mwaya lubaza, lubaji lumo ujitu mulekese, kabiji ne banabakazhi nabo pamo. Kika, kyo mwataina mba kafwako mushingi ne byonka bijitu bakabwa, umo ku mukwabo. Lukatazho lweepi? Amiwa kechi mbena kwimukozha ne. Mbena kwimubulatu mba ke kwikala na bademona, kabiji mubena kuteleka ku mipashi yakubepaika ayo ibena kwi mubuula, “akyo kijitu bulongo,” bino kasa kiji bubela.

<sup>84</sup> Jipeke ja wichi jikasema wichi. Inge wi Mwinakilishitu, kechi wakonsha kuuba kyokyo ne. Anweba kuuba mwikyuba ne. Anweba kuuba mwikyuba ne. Uji na lwitabilo lwa maana akufunda kabiji ne kwamba mba, “Mulongo Branham, Amiwa naketekela Baibolo.” Bumi bobo bukubuula mba kechi byo uji ne. Amena. Mipashi yakubepaika kwimena Kyambo kya Lesa.

<sup>85</sup> Aye wayukile po aimene, Mikaya wayukile. Aye wajinga na Kyambo kya Lesa. Aye wajinga muntu wabula kuyukanyikwa. Kafwako nangwa muntu umo wamutemenwe ne mambo wabulange'ene Bukine, nangwatu batemenwe baabo basapwishi.

<sup>86</sup> Pano, kintu kikwabo kyaubiwe. Naketekela kabiji ne kulanguluka mba muntu yense uji na kyo apitamo na Lesa, nangwa mwanamukazhi, wafwainwa kwikalako na lubaji lwa ng'umvwinno ya ku mubiji. Amiwa nekiketekela. Abyo ibyo. Bino mwayuka kine kintu nyi? Abo batola ng'umvwinno ya ku mubiji ne kubika pa lubatizhilo lwa Mupashi Wazhila. Abo booba kyongo kyabaya bingi, bino kafwako nangwa kimo kijimo ne. Obewa wafwainwa kwikala wazhila pamotu nobe byo uba kyongo, apo po ukekala bulongo. Byakumvwa ku mubiji bijitu bulongo; "makayo a ku mubiji muji byakumwenamo bichechetu." Pakuuba mipashi yakubepaika yatwela mu jibumba ja bantu babuzhile, kabiji baji nabo ke pakukokolokela "mambotu akuuba mba bakonsha kubijika" nangwa "mambotu bakonsha kuzha, mambo bakonsha kwikala na ng'umvwinno ya kumubiji."

<sup>87</sup> Awa mulongo wakala kokwa, ntangi wa bonse ba bangauzhi, basapwishi, aye wajinga washininwa bingi mba ujitu bulongo, kya kuuba mba wilengejile mwine masengo kabiji wazhokolokele na kuzha, kabiji kwajinga kisangajimbwe kyabaya bingi. Aye wailenga na kupangamo mazhita akwabo a Benasilya kufuma mu kyaalo. Bino kyajinga bubela! Kyambo kya Lesa kyaambile kyapusanako. Amena. Monai, wakonsha kwikala na ng'umvwinno ya ku mubiji ijitu bulongo, inge waikala na nkebelo yaitabilwa, musango waitabilwa wa ng'umvwinno ya kumubiji ubena kutangijila ng'umvwinno yobe.

<sup>88</sup> Davida wazhile ku meso akwa Nkambo, kabiji mukazhi wanji wamusekele. Kabiji Lesa watajile panshi kufuma Mwiulu, ne kwamba mba, "Davida, obewa wi muntu wa mwayila muchima Wami Amiwa mwine." Pakuuba nkebelo yanji yajinga yaitabilwa. Bumi bwanji bwajinga bwaoloka, panyuma yakyo.

<sup>89</sup> Nanchi, mambotu akuuba mba twakonsha kumvwa ng'umvwinno ya kumubiji, kechi kyalumbulula mba atweba twapuluka ne. Mambo tuya ku kipwilo, kechi kyalumbulula mba twapulukane. Kechi muketekele muyoyo mipashi yakubepaika ne. Mwine Mupashi wakwa Lesa, Kyambo kya Lesa kyakine, ke Bukine bwa Lesa; awo ke Lukunwa wa Lesa, ye uleta Lesa mu bumi bobo; kwikala bulesa, wazhijikwa, wazhila.

<sup>90</sup> Mu bantu bavula muji byakumvwa umvwa ku mubji, ne bikwabotu, mutanwa byakwambaamba ne bya kuyebeka, kabiji ne bintu byavula byabula bya bulesa. Mulongo, abwa ke bululu mu kipwilo. Ke bulume bwa demona. Mupashi wa banabalume ne banabakazhi utwela mu umo ne mukwabo, kabiji ne kweseka

kufumyapo, kwaamba mba, “*Akye* kechi kiji bulongo ne, kabiji *akye* kechi kiji bulongo ne, kabiji *akya* kechi kiji bulongo ne.” Inge mwakonsha kwikilondela, bimye naini mu teni ke yenka muntu uleta lukatazho, abyo kechi biji bulongo ne. Amena. Lesa washikwa lwabano mukachi ka balongo. Ikalai na munema, ikalai bazhila, temwai Lesa, imanai kwi Aye. Kabiji kikulutu wayuka mba bumi bobo bubena kwendela pamo na Baibolo, na muchima watoka, milanguluko yatoka, butemwe ku mulongo obe, na kwesekesha kushimika Bufumu bwa Lesa, kabiji ne kuuba byo byo biintu, mvwajilo yaitabilwa, bwikalo bwaitabilwa, ng’ambilo yaitabilwa, kuya ku bifulo byaitabilwa, nanchi popo wafwainwa kwikala na ng’umvwino ya kumubiji yo ukeba, kabiji uji yense ukekitabizha.

<sup>91</sup> Yesu waambile mba, “Anweba mwi mukele wa panopantanda. Inge mukele wataya kutobala kwanji, kechi ukekala wawama ne, wafwainwatu kutaiwa ne kunyataulwa ku bantu.” Inge obewa wi mukele bunke bobo, kechi wawama ne. Pakuuba umvwe uji na kitobezha, waikala bu mukele ne ntanda ikomvwa kilaka. Inge waikala bu mukele, bakela na kilaka. Oo, ami!

<sup>92</sup> Mipashi yakubepaika ibena kuya kulutwe, bademona befya. Talai, tuji mu juba japelako. Tuji mu kimye kyapelako. Ntanda ineengezha kufika ku mutwe wayo, kijitu pamo nobe kipute pantu pamo kibena kuya na kusabika juba jimo jibena kwiya kabiji ne manakazhi akafumamo. Kyaikalatu ke ndochi. Kafwako muchi wa kwikibuka ne. Abo bakana awa—awa muchi. Abo bakana muchi. Mwatana kipute ke kivimbe, kabiji inge wabula kutoma penisilini nangwatu kintu kikwabo kyakwikifumyapo, nangwa kintu kikwabo, kikatwajijilatu na kukoma poso kyasabika.

<sup>93</sup> Abyo ntanda byo byo yauba. Kyatatwile, kechi papita kimye kyabaya ne, ke kulekelelako. Batatula kuya mungi na milanguluko ikatampe, mipashi yabubela yatwelamo kabiji yatatula kubula bantu *kikye*, *kyokya*, nangwa *kikwabo*. Twaabenamo naini aduleendi ne madinominesheni apusanapusana, uji yense na milanguluko yapusanako. Baamba mba, “Twaketekela *kikye*, kwapwa! Byo byonka byo twaketekela.” Abo kechi bakonsha kuleka Mupashi Wazhila kwiyamo ne. Abo kechi bakonsha kwikala na jishinda-jaitabilwa ne. Lesa uji na jibumba ja bantu bakonsha kubijika, kabiji muntu yense ke abijike. Abo baji na bamo bakonsha kwamba na jimi, nanchi yense ke kwamba na jimi. Bonse baya muyuwe musango, poso kyaikala (kika?) kine yayuzhiwamo na mipashi yakubepaika, na kubepaika bantu bobenga iye ng’umvwino bino kasa mwabula Lesa nangwa pacheche mu kyokyo. Babwela baya na kwikala bwikala buji bonse bobasaka kwikelamo, kabiji babwela ke bekitele mba “Bwinakilishitu.”

<sup>94</sup> Kabiji ntanda yaikala na kutalapo, na kwamba mba, “Kyawama, monai boba! Amiwa ne wawama pamotu ne abo.”

<sup>95</sup> Nobe byo Naambile bufuku bukwapo pa ngulu, byobiji ne ndengamambo. Kuuba mwazhachisha . . .Ndengamambo ke ndengamambo. Kechi mwakonsha kweseka kumwalula ne. Kechi mwakonsha kweseka ku mubuula *kikye*, *kyokya*, nangwa *kikwabo*. Aye ndengamambo, kyakutatwilapotu. Aye ke ngulu, kyakutatwilapotu. Aye kechi wayukapo ne lupusano ne. Inge waya na kumona bizhimwezhimwe, kabiji waya Pamulungu, kabiji waya ku bisela bya mapila, kabiji aye uba byonse bye bintu, aye ke ndengamambo, kyakutatwilapotu. Kisemwa kyanji kijitu pamo nobe ngulu. Awa ngulu wakala ubika mona wanji pa mulumba wandochi ne kujapo kunwa yonse, kabiji ne bintu byonse; kyawama, ko kuuba mba, aye ke ngulu. Anweba kuuba mwazhachisha ne. Aye ke ngulu. Abyo byo kiji na bandengamambo. Bino umvwe obewa witela obewa mwine mba ne Mwinakilishitu, kabiji watwezhamo ne moona obe, nishi obewa kechi wa mukila kuwama ne, bino, obewa wakilapo. Lupukaimo mukachi kakyo. Lekai ntanda ifumemo. Lekai iyenga. Lekai Lesa. Lekai iyenga.

<sup>96</sup> Mwakonsha kulekelako byepi kuya? Nanchi bantu bavula babena kukumya leelo, ke kwamba mba, “Kyawama, Mulongo Branham, wakonsha kulekelako byepi?” Nayuka mba mwaumvwa byavula bya masukuulu a mamboawama pakikye, “lekai kiyenga.” Bantu bavula bengilatu masulwila, na kweseka kulekelelako. Bntu bavula beya na kwamba mba, “Mbeni kusaka kuya pa kuzhikilwa na zala-pa moba foote pakuuba mba Nkonshe kuubapo kintu kimo.” Obewa kechi ukebewa kuzhikilwa na zala pa moba-foote ne. Anweba mwafwainwa kulekelako ntanda kabiji ne byonse bye bintu bya bu diabola, ne kusenda Kyambo kya Lesa mu muchima obe. Obewa wafwainwa kufunjishiwa kuuba kyokyo. Obewa kuuba wikyuba na kutolauka peulu-ne-panshi ne, nangwa kwikyuba na kuzhikilwa na zala-kwa moba foote. Obewa wikyuba na bumi bwapanwa kwi Lesa Wabulume bonse.

<sup>97</sup> Nobe mwaana muheche. Najikumona mwanami muheche kunyuma kokwa, bainanji na kumumvwika kajekete, lukeelo luno. Aye wakebelenga kutola kuboko kwanji kwacheche kwakala mu kuboko kwa jekete. Aye kechi wakonsha kubika kuboko kwanji momwa ne; kechi wayuka mwakubila ne. Mwafwainwa kutangijila mukoko wanji. Aye ukeba kutwezhamo mukoko wanji, bino aye ukwatakwatatu ponse ponse. Aye kechi ufika mu mukoko wajekete ne. Aye wayuka mba kechi uji mu mukoko ne.

<sup>98</sup> Kabiji obewa wayuka mba kechi uji bulongo na Lesa ne, inge ukiyebeka, kubepa bubela, ne kuuba byonse. Kechi wakonsha kwikala bulongo na Lesa ne, Amiwa kechi natako muchima nagwa wikale na bipwilo byavula ne, kanatu mweo

obe waaluluka. Mulongo, awo ke musango wakala, bino akya kikanselauka ne kubika masuku mu mweo obe. Ibyo!

<sup>99</sup> Waeseka kutwezhamo mukoko, wafwainwa kwikala na muntu umo wakumutangijila, mwakutwezhezha mukoko wanji. Kabiji umvwe watwezha mukoko wanji mu kajekete, aye uyuka mba ujitu bulongo.

<sup>100</sup> Abyo byobyoyo kiji na yense wasemwa jibiji Mwinakilishitu. Umvwe kine watwela mwi Lesa, aye umona bumi bwanji na Kyambo kya Lesa ne kuvuluka mba uji mundonda yakyo Kyonse. Aye uji na kukooka muchima, butekanye, wazhindama, bukimote, bulume, lwitabilo, lusekelo, lusekelo, mutende. Aye kechi ukupulwa kupulwa nobe kalunga kaji na kipupu ne. Aye kechi wasakamanapo kintu nangwa kimo ne. Aye kechi utolauka *papo* ne *popa*, nobe kizhiko kya botolo kiji pa kalunga ka meema kakatampe kaji na kipupu. Aye waikajikwa. Muchima wanji watoka. Milanguluko yanji yatoka. Nkebelo yanji yatoka. Mashinda anji akwabo a oloka. Kabiji aye wayuka mba uji mundonda na Kyambo kya Lesa. Konse kalunga kabafu kechi kakonsha ku musukanya ne. Aye waikajikwa mundonda ya Kyambo kya Lesa. Aye uji na butemwe bwa Bulesa, mu muchima mwanji mwatoka, ku mwanamulume yense ne mwanamukazhi. Aye uji na... Aye wafumako ku bintu bya muntanda, bafwa kwi aye; kechi ukeba kutwajijila nabyo ne. Kika, obewa kechi wakonsha kwikala nsongwakazhi wa Mupashi-Wazhila ne wamvwala bya kumvwala byabula-bya bulesa kabiji walupuka pabula nangwa kintu kimo ne. Ine, mwane.

<sup>101</sup> Bino, kechi kujipo kine kintu kya kumubujila mba waya mungi ne, mambo kechi wakonsha ku kuketekela ne, mambo abyo byobyoka byo ayuka. Abyo lo lusekelo lwanji. Awa mwanamukazhi wamvwala atwa tubintu tucheche; walupuka pangye, mabaanga abufuku, mu kimye banabalume po beya ku nzubo; babena kwiya na kuwamisha lubaza, nobe kuuba... Kabiji wambula mba kijitu bulongo? Mwanamukazhi, Amiwa kechi natazha mukuba mba anweba—mba anweba mwatama ne. Amiwa kechi natazha mu kuuba mba byubilo byatama ne. Bino kechi uvuluka, nyenga, amba mupashi wabubipisho wakukwata ne. Kika kyo wakonsha kwikyubila? Obewa uji na maana akuyuka mba kechi kwatalala ne. Kwakaba. Awa ye mupashi wabubipisho.

<sup>102</sup> Obewa waamba mba, “Amiwa? Amiwa, Naile ku kipwilo!” Nebukadineza wajinga muntu mukatampe. Bino, mambo uji na bwitote, Lesa wamupele mupashi wa ng’ombe, kabiji amba mulekai ajenga nsono pa myaka sebeni, kabiji ngala yanji yakomene nobe byonka byo kyubiwa ku baabo banabakazhi bamo. Abyo ibyo. Kabiji watwelelelwa na bademona.

<sup>103</sup> Mwanamulume umo wajinga na bademona kabiji wavula ne byakumvwala byanji. Kechi bakonsheshe ku mumvwika bya

kumwala ne. Bushe mwamona kyo Nalumbulula? Ke mipashi yakubepaika.

<sup>104</sup> Kipwilo kyenu kiswisha byoabyo. Musapwishi wenu uji na moyo wakwambapo kintu kiji kyonse, moyo mba mwakabula kumupa bya bujikumi byenu. Ao oene mambo. Alo lo lukatazho. Ami, buwame! Wakonsha kusapwila byepi ku jibumba ja bikwangala, kana wibalulula baikala bulongo na Lesa, kyakutatwilapotu? Abo bakabika myona yabo mu bintu byafwa kimyetu kyonse. Kyo mubena kukeba ke kufumyamo, kabiji ne musango wakusangululwa-kwakala kwapita kufuma ku kitulu kimo ne kuya ku kikwabo, kabiji bikai banabalume ne banabakazhi bekalu bulongo na Lesa. Lekelaiko, bintu bya muntanda! Lekelaiko, musango-wa kusapwila byanekena. Amena. Sapwilai Mamboawama. Lesa ye waambile byoabyo. “Inge obewa watemwa ntanda, nangwa bintu bya muntanda, butemwe bwakwa Lesa kechi buji mwi obewa ne.”

<sup>105</sup> Bantu bakonsha kukiluka peulu-ne-panshi, kabiji ne kubijika bufuku bonse, kabiji ne kwamba mujimi nobe kwichila kunde pa mwayi wauma; ne kulupukamo, lukeelo lwa londelapo, kasa aji na bukaji bwabaya bwa kulwa na kyela kya kuchibako bichi, ne kutwajijila kuya na kubuulang’ana kintu kimo mu kipwilo kyakonsha kulengela kipwilo kyonse kupalang’ana. Kechi kijipo muntanda ne ke kubepaika, mipashi ya bademona! Nasaka kubwela ku Kyambo, amo Lesa mo aji watoka, wazhila. Amena. Abyo ibyo. Mipashi yakubepaika kwimena Kyambo kya Lesa!

<sup>106</sup> Kuji muntu umo, kechi papita kimye kyabaya ne, uji na mwanamukazhi muheche. . . Bakatolika baji na bavula kokwa. Mu kimye kyanji kyakuleka kuya ku mumwezhi, kimyeka mu maboko anji ne pa kilungi kyanji. Inge musapwishi wawama uji na Mupashi Wazhila. . . Nalangulukile. Awa mwanamulume wajinga na botolo wa byoabya bintu, mu maboo anji, kasa azhokoloka na kushinga bantu. Yii! Lusa! Ke antikilishitu! Amiwa kechi nataka muchima ne nangwa mashi afuma mu moona wani nangwa ku mutwe wani, nangwa kwepi, mulongo, kechi pajipo mashi akonsha kutola kifulo kya kwa Yesu Kilishitu Mwaana wakwa Lesa ne. Ao o Mashi o Nayukapo kintu kimo. Aye wakonsha kwikala na manyi abena kufuma mu kuboko kumo, kabiji ne waini mukwabo, bino, inge wikingijisha mu musango uji yense wa bupopweshi, ke diabola. Pakumona basapwishi byo bakonsha kulondela bintu byayewa musango!

<sup>107</sup> Kyo tubena kukeba, kubwela ku Buuku Utangijila, kubwela ku Kyambo kya Lesa! Akye kyo Kyambo kya Lesa, wapeshiwa Baibolo wakala. Kwaamba mba, “Kyawama, Amiwa naumvwa moyo wakwikala kyokya, Mulongo Branham. Amiwa jina moyo Wakutaya lusekelo lwami.” Lukatazho lujipi? Anweba kechi mwayuka lusekelo byo luji ne.

108 Amiwa naamba mba kechi Zhachisha kitomi pa kuya na kupendwa ne. Aye wikimweshwa ku mubiji. Aye kechi wayuka ne. Aye wimana, lukeelo, aye uji na ng'umvwino ya ku mubiji, wikala wakooka. Uya na kumuletela abiji nangwa asatu mabotolo a malwa, kabiji walupuka na kumuletela wisiki, kabiji ne byonse bya yewa musango.

Awa upepa fwaka wikala kunyuma na kupepa, kabiji ne kulupwila bwishi mu myona nobe shitima wa kusenda pipe. Byo byonka. Amiwa kechi mbena kumuzhachisha ne; alo loloka lusekelo lo ayuka. Byo byonka byo ayukapo. Aye ke ngulu, mwaila kisemwa.

109 Kimube buvu anweba mwamba mba Mwibenakilishitu kabiji mwaimena pabyobyoyo pakuuba mba mumvwe lusekelo, bino Mupashi Wazhila Mamboawama kechi kintu kikwabo ne ke nzubo ikatampe ya lusekelo. Aa Mamboawama a Mupashi Wazhila ke kupendwang'ana kwalumbuluka kwa muntu uji na ng'umvwino ya ku mubiji. Obewa ukatola meema a Mamboawama a Yesu Kilishitu, bayuzhiwa na Mupashi Wazhila, wapendwa poso wafuma paino ntanda, amena, lusekelo lwa kukakalwa kwamba lwayulamo lukumo. Kuji lutundaiko lwatwajijila. Ke kupendwa kwatwajijila, watoma mute kabiji ne bufuku! Amena. Akyo kyo Kyambo kya Lesa.

110 Kipwilo kyaiya, kyasendako kintu kingi. Bekala na kijilo kicheche ko baya bonse ku kitulu, na kwikala na kisangajimbwe. Kijilo kya kupwilakena pamo, kwikala na lumvwang'ano. Abo ibyo. Kwikala na mazha, kimye kimo, pa nzubo ya membala umo, kimye kimo mu kibamba kya kipwilo. Mazha, kupingakenyamo, na kukeba kintu kimo kya kwibapwisha kilaka. Lukatazho lujipi? Abo ke jibumba jikatampe ja bangulu, nangwa byonkyobyoyo. Abo ke bangulu, kyakutatwilapotu. Inge bakonsha kusambakana ne Kilishitu, bakonsha kwikala bingi na lusekelo, abya bintu byakonsha kufwa kwakubula kufika ne pakachi kabufuku, kwi abo. Mamboawama, bapendwa mu Mupashi, lusekelo lwakubulwa kwamba lwayulwamo lukumo.

111 Kechi muzhachishe ndengamambo ne; mubilai lusa. Mulekai atwajijile kupepa fwesho yanji, mulekai atome malwa anji, mulekai ekale na kitupa kyanji kya kijiilo. Akyo kyo kisangajimbwe kyanji. Kechi mu muzhachishe ne. Kwiya pa nzubo ne bintu byonse, wakooka kabiji wapwamo, ubena kukeba kisangajimbwe. Kine kintu kyo wafwainwa kuuba ke kwikala bumi bwa bulesa akyo kyonsha kushiniikisha kwi aye amba Mamboawama aji na teni sauzande kukila pa kyokyo, kyo amulamina aye. [Kafwapo bijipo pa tepu ne—Waku.] Kabiji umvwe wafwa muyewa musango, ukaya ku kalunga kabafu, na malwa anji. Ako ko kupendwa kwa diabola. Inge wafwa, kasa abena kupepa yoya fwesho yakala, Lesa ye Mutonyi wabo. Inge wafwa, kasa abena kuya kokwa, na kuzha, kabiji



na kunyemanyema na bya kumvwala bya bumbulwa koloka, Lesa ye Mutonyi wabo.

<sup>112</sup> Bino kuji kintu kimo, inge wafwa na kushingwa manyi kwa Bulume bwa Mupashi Wazhila, nobe byonka byaubile Sepetena byo antajile mwiulu mu kilungi kya Lesa, waambile mba, “Namona Mwiulu mwashikuka, ne Yesu kasa aimana ku kuboko kwa kilujo,” obewa wi wakuya Mwiulu, nobe kamimbya pa kibokoshi kyanko. Amena.

<sup>113</sup> Mipashi yakubepaika kwimena Kyambo kya Lesa! Lekelelaiko, lekai kiyenga. “Wikyuba byepi, Mulongo Branham?” Lekaitu kiyenga. Abyo byo byonka byo mwafwainwa kuuba. Tolai Kyambo kya Lesa. Kechi mweseke kwingila kintu nangwa kimo ne. Kechi muye ku kitapisho na kupumapo ne, bijikai, “Lesa, mpai Mupashi Wazhila! Nkambo, mpai Mupashi Wazhila!” Aye kuuba waiya ne, obewa ubena kupumatu pa kitapisho. Akyo kechi kyubapo kintu kimo kyawama ne. Ine. Abyo kechi byo Eya ne. Ke, kumusenda ponka pa Kyambo Kyanji!

<sup>114</sup> Monai pe Petelo. Petelo wajinga mulukatazho, wamwekelenga nobe ubena kufwa. Kabiji aye wamwene Nkambo waiya, kasa enda pa meema. Kabiji waambile mba, “Nkambo, inge yenu Anweba, ng’ambilai amiwa ng’ende.”

Nkambo waambile mba, “Iya.”

<sup>115</sup> Pano Petelo waambile mba, “Pano pembelaiko mineti umo, Nkambo, lekai ngye na kuzhikilwa na zala kwa mobafoote, pakuuba mba mone inge Nakonsha kwenda pa oa meema, nangwa ine. Anweba Nkambo, lekai ngikale na Mupashi wavula pe amiwa, kyakuuba mba Nakonsha kuzha mu Mupashi ne kwamba mujimi, mu buno bwato, popo Nakonsha kulupukamo”? Ine, mwane! Aye watolele Lesa pa Kyambo Kyanji, ne kulekelelako kuya. Lesa wamutolele.

<sup>116</sup> Ibyepi Lesa kyo akumenye Mosesa, kabiji Aye waambile mba, “Mosesa, yanga momwa mu Ijipita, na kubuula Felo, ‘Lekai bantu Bami bayenga’”? Pano ibyepi Mosesa inge waambile mba, “Ndekai ngye nakuzhikilwa na zala pa moba-fote, patanshi, kabiji mone kana Njina lwitabilo lwafwainwa kwimukokela Anweba, Lesa. Mpai kintu kimo, kintu kikwabo, Nkambo. Lekai ne mubuuleko Kintu kimo, lekai mone kana Nji mu Mupashi, patanshi”? Mosesa kechi waipwizhepo mepuzho ne, aye wasendele Lesa pa Kyambo Kyanji, kaye ne kuya. Abyo byobyoyo wafwainwa kwikyuba, sendai Lesa pa Kyambo Kyanji. Nanchi pano wayuka mba obewa wakonsha kwikyuba. Aye kechi wapembejilenga mba kintu kikwabo kyubiwe ne, aye watwajijiletu na kwikyuba.

<sup>117</sup> Pano nga Elaija, byo afumine kokwa ku Mutumba wa Kamela, wajinga popa peulu kimye kyabaya? Kabiji wakumenye mwanamukazhi kituzhi kamulanda. Aye wajinga...Aye

wajinga mwenyi, mu Ngetila. Kabiji byo amukumenye kokwa, watolelenga tunsala, mu lubaza. Kabiji Lesa wamwambijile mba, “Yanga kokwa ku nzubo ya kituzhi.” Ing’anyi kifulo kya kuyako musapwishi!

<sup>118</sup> Aye keaye konkakwa ku nzubo ya kituzhi. Kabiji mwanamukazhi byo aubile, wajinga na nsala ibiji. Wamwipwizhe mba, “Kika kyo ubena kuuba?”

<sup>119</sup> Wakumbwile mba, “Mbeni kutola nsala. Njina bunga bwaesakanatu bwa kulenga tubashinkwa. Tontoka to Nashala nato. Papita myaka isatu kufuma po twajinga na mvula.” Kabiji waambile mba, “Nanchi Amiwa mbeni kulenga tutwe tubashikwa. Kabiji amiwa ne nsongwalume twituje, ne kufwa tufwe.”

<sup>120</sup> Aye waambile mba, “Ndengelaipo kamo, patanshi!” Aleluya! Oo, Nayuka mba Amiwa ne muntu wakonya pacheche, bino Amiwa nji kulubaji lwa Nkambo, nangwa byonkabyo. Naambile mba, “Ndengelaipo kamo, patanshi. Mambo, AYO BYOBYAAMBA AYE NKAMBO.” Ayo byo byo kiji.

<sup>121</sup> Kyo kika? “Fundai patanshi kusakisha Bufumu bwa Lesa, ne bololoke Bwanji.” Kechi Bufumu bwa Lesa ne “kakyongo kacheche,” kechi Bufumu bwa Lesa ne “ng’umvwino icheche ya kumubiji,” kechi Bufumu bwa Lesa ne “kacheche *kako* nangwa *koka*.” Kana, “Lesa, ne Bololoke Bwanji, kabiji ne byonse bye bintu bikalondelwapo.” Bikai palutwe!

<sup>122</sup> Pano, awa kituzhi waumvwine kyokyo. “Lwitabilo lwiya pa kumvwa, ne kumvwa nako kwa Kyambo.” Waambile mba, “Akyo kyo Kyambo kya Nkambo, mambo aawe ke muntu wazhila wakwa Lesa. Awa ke ngauzhi wakwa Lesa, kabiji Nayuka mba ke Bukine. Kabiji akyo ke Kyambo kya Lesa.”

<sup>123</sup> Bino, kechi wanyemejile na kwipuzha bena kikalakulo mwakwikyubila ne. Aye kechi wakebelenga kwabana nabo . . . ne kubuula bena kikalakulo, kwaamba mba, “Pano, mwalanguluka byepi? Musapwishi uji ku nzubo yami, ubena kwamba *kikye*. Susie, walangulukapo ka pa *kikye*?”

<sup>124</sup> Aye watwelele mukachi, watatwile kulenga. Aye walekejileko. Aye walekejileko kyo ajinga nakyo, pakuuba mba atambwilemo byavula. Akyo kyo kibena kukebewa mu ntanda leelo, ke musango-wawama wakala wa kule-kelako kyo uji nakyo. Aleluya! Aye wafumishemo, pakuuba mba ayuzhiwemo. Aye wafumishemo tumanyi tose to ajinga nato, kabiji tose tu manyi to ajinga nato ne tubunga to ajinga nato, ku musapwishi, ku Bufumu bwa Lesa. Kabiji byo afumishemo byonse, Lesa waikijile, wayuzha mu mulondo wa bunga, wayuzha mu botolo wa manyi. Aye wafumishemo ne jikwabo, kwitulwila pa nsanyi ya musapwishi. Kabiji Waiya, wibiyuzha ne jikwabo. Aye wabikilemo. Kimye kyonse kyo afumishemo, Aye wayuzhizhemo.

125 Naamba, leelo, inge muntu wafumyamo kubulwa maana konse kwakutwajijila nabyo, kabiji ne kupashang'anya Bwinakilishitu, ne kuleka Mupashi Wazhila wasenda Kifulo Kyanji, kwakonsha kwikala kusangululwa mu wa Bunambala eiti ne Mukwakwa wa Penn ako kwakonsha kasambankana kyaalo kyonse. Fumyaimo bu mbulwa maana. Bwelai ku Kyambo kya Lesa. Fumyaimo, pa kuuba mba muyuzhiwe. Anweba lekelaiko, kabiji Lesa ukalengela kwiya. Anweba mwalupulamo, Lesa ukayuzhama. Bintu byonse byawama, bya kuuba mba, "Wafwainwa kuuba *kikye*, kabiji wafwainwa kuuba *kyokya*; kabiji wafwainwa kuuba *kikye* ne kufwainwa kuuba *kyokya*." Kilubaiko! Kifumyaimo mu mweo wenu!

126 Kwaamba mba, "Lesu, ndekai ami, kufuma ku yuwe yense. . . jino juba, ngikale Wenu yense. Nkambo, Naiya na muchima walajika. Naiya na mupashi walajika. Nemutemwa Anweba. Mwayuka Nemutemwa Anweba. Kabiji Nasaka kulubako ku byonse bye byabulamo maana bya kuzhikilwa nazala moba-fote pakuuba mba Mone kana nakonsha kubwela kwipi kwi Lesa, kabiji byonse *bye*, *abya*, ne *bikwabo*, byonse bye byabulamo maana."

127 Kileke! Kechi kujipo kintu mu Kyambo kikubuula kuzhikilwa na zala moba-foote ne. Kafwako nangwa kimo ne. Kafwamo nangwa kimo muntanda kibena kukubuula mba uzhikilwe nazala ne, kanatu Lesa wakubula. Inge wazhikilwa na zala, kechi wakonsha kumvwa zala ne, kabiji ne kuya mu byonse bye bintu. Byo waikala nazala, mulongo, ukekala na lusekelo ne buwame kimye kyonse. Waambile mba, "Kechi mumweke ku bantu nobe byonka byuuba bakafutufutu ne, na kyabaya, kilungi kyamweshu lusa. 'Amiwa nji pa moba-foote a kuzhikilwa na zala. Masanyi ami kechi anakwana jikwabo ne. Nataya kinemenezhi kya mapaunderi sate, kabiji bambujile mba Mweka bulongo pakupwisha kikye.'" Oo, kafwamo maana! Ke mipashi ibepaika yakwa diabola.

128 Imana uye ku kitapisho, ne kwamba mba "lukumo, lukumo, lukumo," poso wakakalwa ne kwamba kintu kikwabo, kabiji ne kwamba mba, "Obewa wafwainwa kwamba mujimi kasa ukyangye kutambula Mupashi Wazhila." Kechi muji maana ne! Bifumyaimo!

129 Fumyaimo byobyo mu ntachikilo yobe kabiji ne kwiya ku Kyambo kya Lesa! Aye waambile mba, "Lapilai, anweba bonse, kabiji ne kubatizhiwa mu Jizhina ja Yesu Kilishitu mululekelo lwa mambo enu, kabiji mukatambula wabupetu Mupashi Wazhila." Lesa inge wabula kulama Kyambo Kyanji, Aye kechi ke Lesa ne. Amena. Bifumyaimo. Yuzhiwaimo. Amena. Yii! Natemwa kyokyo. Akyo kyo Kyambo Kyanji. Lesa ye wikyambile. Abyo ibyo. Kabiji Lesa byo ekyambile, Lesa ukekilamawizha. Kijitu bulongo. Lunengezho lonse lo muuba, konse kya ku kipwilo ko mwakonsha kuuba. . .

<sup>130</sup> Kijitu pamo nobe kukwe ku mikinyi ya myotoka ko balenga yabaya yavula ya kusenda bipe, nangwa, myotoka yavula ya kusenda bantu. Amiwa naingilanga koka. Kabiji basenda ne kulenga aa masakya akatampe ne bikwabotu, kabiji babikamo ne mapulanga akosa, babika kuzhokoloka ndombe, kabiji bintu byonse bikala byawama, babika ne pa kimbayambaya, kabiji kikala kyafwa nobe musumali wa ku kizhilo. Ingini ikala byobya, kafwamo manyi. Wafwainwa kwikala byonkabya.

<sup>131</sup> Kibena kukeba leelo ke mujilo mu kitetengwa. Kibena kukeba leelo ke luuya lwakaba. Byo kibena kukeba leelo, kipwilo, kubila; kukaba kwakabisha bingi kwa kufumyamo ubi mu bumi bobo, ke butemwe. Kabiji inge mwabula kwitemwa anweba bene na bene, mwakonsha kutemwa byepi Lesa Ao ye mwabula kumonapo? Butemwe bufya ubi bwavula bingi. Twelai mubutemwe ne Lesa, ipo po muketemwa umo ne mukwabo, apo po mukatemwa kipwilo, anweba mukatemwa Kine kintu, obewa ukatemwa byonse biji bulesa, kabiji mu kafumako ku bintu bya muntanda.

<sup>132</sup> Mipashi yakubepaika ibena kuya na kubuula bantu *kikye*, *kyokya*, nangwa *kikwabotu*, “Bafwainwa kuuba *kikye*. Bafwainwa kuuba *kyokya*.” Ke mambo ka kuuba mba madinominesheni aimikwa, kabiji baji na lumwekesho lucheche lo bamba mba, “Kyawama, pano, Naketekela yewa muntu. . . Naketekela mu kyokya kintu kiji nobe kubijika mu Baibolo.” Abyo ibyo. Abo bo bukine. Balengamo dinominesheni kufuma mukikye, “Inge wabijika, uji Nakyo.” Bino kasa wabulakyo ne.

<sup>133</sup> Mukwabo walondelapo waiya, ne kwamba mba, “Kwamba mujimi.” Abyo ibyo. Akyo kiji mu Baibolo. “Kyawama, inge waamba mujimi, obewa uji Nakyo.” Bino bavula ba mwiabo baambile mujimi kabiji kechi bajinga Nakyo ne. Mwamona? Abyo kechi byo Kiji ne. Ine, mwane.

Bavula ba mwiabo baambile mba, “Kyawama, twafwainwa kwaula.”

<sup>134</sup> Monai pa babo bangauzhi kuno na masengo pa mutwe wabo, kukilauka peulu-ne-panshi na kwaula. Mikaya waambile mba, “Anweba, bonse, mwabepa.” Amena. Ibyo. Lesa kechi wikila muyewa musango ne. Lesa waiya mu muchima wabukishika ao wiya na wanekena, mupashi walajika. “Awa uya, na kubyala na mimpolo, ukabwela kwakubula luzhinauko wasangalala, waleta bipangwa byawama.” Amena. Kyumvwishai bulongo, mulunda.

<sup>135</sup> Lwavula lufunjisho lwa bademona, bademona babena kwingila mu myeo ya bantu! Monai byo kipanga bipangwa byakyo. Monai musango ka wa bumi bwa muntu boekala. Monai musango ye babena kubilamo, tajishai byo booba bintu, monai nkebelo yabo byo iji. Kyaikalatu kyabula kukosheka nobe. . . Kabiji inge Ne mubuula kyokyo, “Jishindatu jimo. . . Aye myotoka yaikala papo, yatantama papo. Mwiulu muji ku

Charlestown. Obewa kechi wakonsha kwenda ne. Jishinda ja kwendelamo, ke ja motoka. Kabiji muntu yense ukilang'anya pa ndonda wafwainwa kuleta magaloni atanu a manyi." Uno motoka wanji, bino umvwe kechi uji na manyi ne kechi wakonsha kumwendesha ne. Kyawama, abyo kine, byo kijitu pamo ne Mwiulu. Inge wafwa kwakubula Lesa, Amiwa kechi nasakamana ne nangwa waiketele byepi kabiji myotoka inga yo washimika, inge butemwe bwa Lesa kechi bwakonsha ku kuukokela mu Bufumu bwa Lesa ne, obewa walubilamo.

<sup>136</sup> Kuji mbwela nyuma ne ngyalutwe. Nangwatu awe mujilo uji na ngyalutwe byepi, inge kechi uji na waaya wapanshi ne, kechi kikambuka ne. Abyo ibyo. Obewa wafwainwa kutwezha mizhazhi mu mushiji, waikajikwa mu butemwe bwa Lesa. Oo, mulongo! Letai pamo mbwela nyuma ne ngyalutwe, mukekala na Kyeya, Kyeya kyawama kya Mamboawama kya musango-wakala. Lekai kikumbane kufuma ku kitulu ne kufika ku kitulu kikwabo. Obewa kechi ukekala Nakyo kwakubula akyo ne. Nangwatu wikale na kuzakama ne kukilauka byepi na ngyalutwe, wafwainwa kwikala na waaya mushiji wakwambula akya Kyeya. Amena.

<sup>137</sup> Inge mwamona? Wabika waaya wa mu mushiji pa kikye, kabiji bintu byonse bibwela monka mu kitesheni kyakicheche, monka mu mushiji. Kabiji kimye kyonse muntu kyo ekala watwezha kangala ne kwikajikwa mu Kyambo kya Lesa, kimutwezha mizhazhi ne kumwikajika ku Kalvali, kokwa, apo po kikwata, pa kifulo kya Lesa kyaletelwe ponka, pa kusamisha Kyeya kya Mamboawama. Amena.

<sup>138</sup> Mwayuka lukatazho byo luji? Bantu mu ao masaini akatampe aji na munyango kuno, babena kufwanyikizha kusapwila Mamboawama. Musapwishi mucheche mbiji waishile kwi amiwa keesha, utanwa ku imo dinominesheni yabaisha ijimo mu ino ntanda, kufumyakotu ba Katolika. Aye waambile mba, "Mulongo Branham, Amiwa nakolwa ne kukooka." Waambile mba, "Babena kwitulenga atweba bonse kwikala basapwishi ne kumvwala mikukumba ne kufutula mateneshi, kabiji—kabiji ne kusapwila bintu bimo. Kabiji baketubuula bya kusapwilapo, mu kibese kimo kya mwaka." Aye waambile mba, "Amiwa kuuba natwajijila nakwikyuba ne." Aye waambile mba, "Kika kyo Nakonsha kuuba? Nafwainwa Kutatula kusapwila Mamboawama?"

<sup>139</sup> Naambile mba, "Mulongo, kikulu tu uji na yewa dinominesheni, wikinemeke. Wambengatu byonka byo bafwainwa kwamba. Bino yanga ku pulebisitaya nangwa supulitendati wa kyaalo, ne kwamba mba, 'Mwane, Amiwa nasemekelwe jibiji na Mupashi wakwa Lesa. Kino kyo Kyambo kya Lesa. Inge mwakonsha kuswisha kusapwila Kyokyo, Amiwa nsakwikala mu kipwilo kyenu. Inge mwabula, Amiwa nishi naya. Mwikipane ku muntu mukwabo.'" Kuji jishinda ja

kwikyubilamo. Kupita mumbaji ne. Kwikala na mbwela nyuma ne. Iyaitu ne kwamba byo kiji. Ibyo.

<sup>140</sup> Aye waambile mba, “Mulongo Branham, walanguluka mba Nakonsha kwikala na kipwilo nyi?”

<sup>141</sup> Naambile mba, “Paji Mubiji wanyama wafwa, ba Mpungu bakapwilakena pamo.” Abye ibyo, ba kalondela.

<sup>142</sup> Nobe mwanamulume umo, kimye kimo, watetwile twana twa zolo. Pano, kechi kyakukaya ne. Kechi natazha mu bisela ne. Ne kitazha kiji nakintu kimo. Aye wabikile twana twanji, kabiji kechi wajinga na make avula ne. Wabikile jike ja jimbata pa umo. Kabiji bonse byo batotwele, jimbata wajinga na mwekelo-yabisela yabujile kumwekapo kala ku bazolo. Nanchi nzolo waita bazolo ne twana tuzolo twaiya, pakuuba jimbata kechi jayukile mulaka ne. Bino, juba jimo, kyanje wakala wibatangijile kunyuma ya kipaka. Kwajinga kakola kunyuma ya kipaka. Kaana ka jimbata byo kaumvwine bwema bwa meema, kaile ku meema lubilo. Kyanje wakala waambile mba, “chukwi, chukwi, chukwi.” Kabiji jimbata wa muheche waambile mba, “honk, honk honk.” Aye waile kutala ku meema. Kika? Aye wajinga jimbata, kitemwa kyanji. Byo aumvwine bwema bwa meema, mulongo, aye kechi bamufumisheko ne, mambo wajinga jimbata.

<sup>143</sup> Kabiji Naamba leelo, bantu bonse babena kukeba kutana Lesa, kechi bakaswisha kipwilo kwibakambizha bintu byo bakonsha kubula kwikala, *akya* nangwa *kikwabo*. Inge uji na kitemwa kya Lesa mwi obewa, ukaya ku buzhile. Obewa ukuya mukintu kyaoloka. Obewa ukemenako kintu kiji bulongo. Obewa ukoba kintu kyaoloka. Obewa ukalanguluka jishinda jaitabilwa. Obewa ukekala bwikalo bwaoloka. Inge wi jimbata, ukatemwa meema. Inge wi Mwinakilishitu, ukatemwa Kilishitu. Inge wi diabola, obewa ukatemwa bintu bya diabola. Inge wi kikwangala, ukaja bintu bafwa. Inge wi ngulu, ukaja mushishi wa byabola. Uji pepi leelo? Ibyo. Obewa ubena kwamba mba nji pano, na kuja bintu bya kwa Nkambo, kabiji waya panshi na kutwezha mizhazhi na diabola. Pajipo kintu kimo kiyatama nakyo. Lekai kuteleka ku yoya mipashi; ke badiabola. Nangwa inge kyalumbulula mba ukemana bunke. Banabalume ne banabakazhi bafika ku kintu kimo, pepitu, bajinga banabalume ne banabakazhi baimene bunke na Lesa.

<sup>144</sup> Monai pe Mikaya, byo aimene; nobe kechi jibwe ja Gimbulota, pakuuba pa Jibwe ja Mankulo. Aye waambile mba, “Amiwa kechi nsakwamba kintu nangwa kimo ne. . . Amiwa kechi natako muchima ku kyaamba sukuulu wa mamboawama ne. Amiwa kechi natako muchima byaamba kipwilo kyami ne. Amiwa kechi nasakamana byaamba mfumu ne. Inge bachibako mutwe wami, Amiwa nsakwambatu kyonka Lesa

kyo asakubika mukanwa kami.” Aye wajingatu bulongo. Aye wajingatu bulongo.

<sup>145</sup> Kabiji leelo, banabalume ne banabakazhi, kechi muteko muchima ku bimulamina ntanda ne, ng’anyi buwame bo baji nabo, ng’anyi musango wa muchi wa bbakitelya ye baji nanji, ye bakonsha kukabila, “Inge mwatwela mu kipwilo, mukekalatu bulongo.” Ao ke muchi wabubela. Kika? Obewa ukiji na kikola kya bubi. Abyo ibyo. Bino na kubuula kintu kimo, mulongo, kyakonsha ku kubuka ku bundengamambo, kuuba mba, iya ku Mashi awama a Nkambo Yesu Kilishitu kabiji uyuzhiwe na Mupashi Wazhila, kabiji aye ukakufumya ku bubi bonse, ne nkebelo yobe ikekala yatala Mwiulu, kabiji kechi ukekala na kimye kya bintu bya muntanda ne.

Twayai tulombe.

<sup>146</sup> Taata Wetu Wamwiulu, inge twamona mipashi yakubepaika pa bantu, kabiji twayuka mba babena kulengulula bintu byakwa Lesa, Nalomba, Lesa, namba Anweba musakukwanta mwanamulume yense ne mwanamukazhi uji muno leelo. Lekai aje kikale juba, Nkambo, pakuuba mba bakayuke mba bumi bwabo kechi buji mu ndonda ya Kyambo ne. Kabiji amba babatelekenga ku bintu bingi, abyo diabola byo ebabula na magazini a Mashimikila a Bukine, na bintu byakala byaboola bya muntanda, kabiji ne kumwesa bipikichala bya bupipisho byakala bya televizhonyi. Anweba Lesa, kechi kyakonsheka Benakilishitu kutala ko ne! Lesa, bitulengela kwikala wakolwa. Anweba mwaamba mba bimulengejile Anweba kukolwa, nobe malashila. Anweba mwaamba mba, “Kabwa ubwela ku malashila anji, kabiji ka—kabiji ngulu ubwela ku mateshi anji.” Kabiji kabwa wakala ulasa kintu kimo. Monai muntu wasemwa kichika, byo afwainwa kwikala, muntu wabukafutufutu waiya ku kitapisho, kabiji nobe ubena kulasa ntanda; kasa ubena kuyatu kulutwe, babwela baja bintu bimo ne jikwabo. Anweba Lesa, omvwai Nzubo Yenu, Nkambo. Aleluya! Ntumai Mupashi Wazhila uji na kushininwa kwa kimye-kyakala kwakonsha kutokeshwa kilaka kya muntu ne kutokeshwa mweo wani, ne ku mutokeshwa kabiji ne ku mulengela kwikala kilengwa kyakuya-Mwiulu. Mumpai. . . Bwezhaimo bulume bwa bwanyike bwanji ne luchipo lwaji nobe lwa mpungu, pakuuba mba atumbuke ne kupitaila bintu bya inontanda, ne kuya Mwiulu mwine mo akonsha kumona makatazho byo eya kasa pakilepa. Kwiswishai, Nkambo.

<sup>147</sup> Anweba mupashang’anya bangauzhi Benu kwi, bampungu, aba bajinga na jiso ja mpungu, bakonsha kuya peulu kabiji ne kumona bintu byapalutwe kimye kasa kikyanyye kufika ne. Anweba Lesa, mpeshai akino kipwilo kicheche. Mpeshai bantu beya kuno. Mpeshai benyi baji mu bizhilo byetu leelo. Kabiji bayukishai mba ino Mbila kechi yajikutala ku muntu nangwa umo ne, bino kukizhamo yatala, Nkambo, ku booba babena

kukabila; byo twayuka mba juba jimo twafwainwa kwimana pamo mu luzhachisho lwa Lesa, kabiji ne pakuyuka mba tukazhatwa na mambo a kuyuka Bukine kabiji ne Kwibwamba ne. Taata, Nalomba mba Kisendwe mu muchima uji yense. Mu Jizhina ja Yesu.

<sup>148</sup> Na mitwe yetu yakunama pa kakimye kacheche, Nakumya kana pajipo muntu umo muno lukeelo luno wakonsha kwaamba mba, “Mulongo Branham, Amiwa nakolwa ne kukooka na bibye bintu bicheche byakala. Amiwa njina bintu byawama byaikala mwi amiwa pa kimye kyabaya. Amiwa—Amiwa kimye kyonse mbena kwamba kukila pa kimye kyaitabilwa. Amiwa—Amiwa mbena kuuba bintu byo Nafwainwa kubula kuuba, kabiji Nekiyuka. Kechi kyafwainwa kwikala mu Mwinakilishitu ne. Amiwa kechi keba kuuba kyokyo ne; Lesa wayuka mba Amiwa kechi nkeba ne. Kabiji Amiwa kechi nkeba kuteleka ku yewa mupashi wakala ne jikwabo ne. Ke kintu kyandama mu bumi bwami bonse, kwikala na butemwe bwakine ne kukasuluka mwi Kilishitu. Nakeba kundombeshapo, Mulongo Branham, amba—amba kifume pa jino juba.” Mwakonsha kusutulako kuboko kobe? Mutwe yense kasa akunama. Lesa emupeshe. Oo, ami, maboko avula! Tubitu tucheche twakala, bintu bicheche byakala byakonsha kukulengela kwamba nangwa kutatula musango wakwendeleka mu kipwilo, kyakukulengela kwikala ku lubaji lwa kintu kimo kyamusango yewa. Oo, ako ke kubulwa bulesa. Akyo ke kuleta bufinda mukachi ka balongo. Kabiji kuuba kyokyo ne. Anweba kechi mukeba kyokyo ne. Anweba kechi mukeba kyokyo ne bintu bicheche byakala, kuzhingila kucheche kwakala ne bintu bikwabo byashala, pakuuba mba bikubwezhe panshi.

<sup>149</sup> Ambai mba, “Lesa, Amiwa kechi kyokya kintu ne jikwabo ne. Amiwa nakolwa ne kukooka nakyo. Amiwa ne nengezha kwikitaya. Mbena kwiya pano, Nkambo, kabiji Nasaka kufumya ku kwitemwa kwami konse. Inge mulongo wami wabula kungubila bulongo ne, Amiwa kamulombelela nangwa byonkabyo. Inge bataata babula kunguba bulongo ne, Amiwa kebatemwa nangwa byonkabyo. Inge bakazhi bami banguba kyatama, nangwa balume bami, Amiwa sakwikala, wikepesha, kumeso akwa Lesa. Nkambo, Amiwa talatu ku Bufumu Bwenu. Nasaka milanguluko yami kwikala yaoloka. Nasaka muchima wami kwikala wayula na lusekelo. Amiwa mbena kukeba kuya pepi nobe, inge lukatazho lubena kuzhokoloka, Amiwa keba kwikala na maboko ami peulu kabiji ne muchima wami watoka kumeso Enu, Nkambo, kasa nayuka kikye, amba juba jimo Amiwa ke musambakanya Anweba. Nasaka yewa musango wa kyakupitamo. Nkambo, ndengai kwikala byobya, kufuma ku jino juba.”

<sup>150</sup> Mwakonsha kusutulako kuboko kwenu, muntu umo wajikubula ku sutula kuboko kwanji kimye kicheche kyapitapo.



Lesa emupeshe. Lesa emupeshe. Nyenga, tupai pakwimbila pacheche kasa mitwe yetu yakunama. Bushe mwikishinikisha byepi? Kechi mukayenga pano ne. Kino kechi ke kimye kyakukaya ne. Kino ke kimye kyakutambulwila. Kino ke kimye kyo wafwainwa Kwikitambula. Iyai, mwikifumyemo ponka pano. Mwakonsha nyi? Iyai, panai byonse byo muji nabyo kwi Lesa. Ambai mba, “Lesa, Amiwa kechi nji na byavula ne. Amiwa ne mucheche muka muntu. Amiwa kechi nakonsha kuuba byavula ne, Nkambo, bino Na—Nakonsha kutanga Baibolo Wenu, Nakonsha kulomba pajuba pajuba. Nakonsha kufumyamo byonse byatama mu milanguluko yami. Nakonsha kwibitaya byonse bya bintu. Amiwa nazhatwa ku bintu byavula abyoy musapwishi byo aamba lukeelo luno, nanchi Amiwa—Amiwa mbena kwibifumyamo leelo. Amiwa kechi nebikeba ne. Lesa, ngyuzhai na butemwe. Ngyuzhai na kintu kyakundengela kutemwa mulwany Wami wakijishamo. Amiwa ne kikeba bingi, Nkambo.”

<sup>151</sup> Kimye kyo abena kulomba kuno, kechi mwakonsha kwiya mwimane pa kitapisho mu ka kimye kacheche, mukimye kyo twanungakana na kyambo kya milombelo. Inge kine mwashinikisha pa kyokyo, inge anweba kine mwinengezha kwikitaya, anweba kechi musakufuma kuno ku kitapisho leelo na kyokya mu muchima wenu ne, inge mwakonsha kwiya wabukishika. Kabiji mwambe mba, “Amiwa mbena kwiya kuno na kwimana, pa mineti umo, Mulongo Branham, ee, kimye kyo muji na kyambo kya milombelo pamo ne amiwa, pa muntu bunke.” Na—Nasaka mba anweba mwiye, mulombe. Mwakonsha kwiya pano nyi? Na mitwe yenu yakunama, ng’anyi wakonsha kwimana eye ku kitapisho, imanai ku kitapisho?

Kundeke ami ne, Anweba Mupulushi  
wabibusa,  
Umwai kujila kwami;  
Byo Mupepula bakwetu,  
Oo, kechi mundeke ne.  
Mupulushi, Mupulushi,  
Umwai kujila kwami;  
Byo Mupepula bakwetu,  
Oo, kechi mundeke ne.

<sup>152</sup> Nangwa wabanda bingi mu Bwinakilishitu, kabiji obewa ukijitu nayoyo mipashi yakala icheche yamba kwi obewa, ikulengela kutumbuka, yakulengela obewa kwamba pa muntu umo. Inge muntu umo waiya kabiji watatula kwamba pa muntu ungi, obewa wakwatankana nabo kabiji, oo, ne kwibambila kyabaya. Akya kyatama, mulongo. Kechi wakonsha kuuba kyokyo ne. Akyo kikakulengela kubula kutwela Muntanda ya mulaye. Inge uji na bintu byakala byo wafwainwa kubula kwikala nabyo, inge butemwe bwa Lesa kechi buji mu muchima obe ne, kechi wafwainwa kwikala inetu ne mwanamulume,

iyai ne kwamba mba, “Lesu, ponka pano Amiwa mbena kwikifumyamo, lukeelo luno, ponkapano. Amiwa mbena kufuma ku kino kitapisho muntu wapusanako.” Mwakonsha kwiya nyi?

<sup>153</sup> Bushe mujipo ndengamambo ao ukyangye ku mwitaba Yesu, kabiji mwayuka mba wi ndengamambo, kechi mwamuyuka Aye kwikala Mupulushi wenu? Mwaamba mba, “Mulongo Branham, ee, Nalangulukilenga mba Njina kinemenezhi kyabaya bingi. Ngya ku bya kuzha ne bijilo bya kisangajimbwe kabiji ne byonse bye bintu. Amiwa ntamba misango ya bikope byatama. Kabiji Amiwa—Amiwa tanga mabuuku atama. Amiwa tanga mabuuku akala aji na mashimikila a mwenga mukachi kaao. Amiwa ngumvwa bulongo kwi atanga.” Mulongo, pajipo kintu kimo kyatama ne obewa. Akyo kyo kilaka kyobe; monai, ndekai mone muntu byo atanga, lekai mone byo atamba, nteleke ku nyimbo yo atelekako.

<sup>154</sup> Juba jikwabo, pakwiya mu mukwakwa na motoka, muntu umo wayishile na kushikula waileshi wami, kwajinga musango wa nyimbo ya mwenga. Naambile mba, “Kinshike akyo kintu. Amiwa kechi mbena kukeba kumvwa kyokyo ne.” Bintu bya musango-wayoyo ng’imbilo yakala.

Waambile mba, “Kika, Natemwa kumvwa byobyoy.”

Naambile mba, “Musango obe watama. Waya mungi.”

<sup>155</sup> Byo Najinga kokwa, moba acheche pakupita kyokyo, peulu ku lubaji lwa mutumba nangwa ku lubaji lwa katumbatumba, na kuloba, na muntu umo. Atwa tung’onyi twatucheche twaimbilenga. Bang’onyi baubilenga kyongo. Awa matambwe wakala wapichilenga mwiulu, nangwa mba kamatambwe, na kwimba mitotelo. Nabijikile ku yewa nsongwalume, Naambile mba, “Tala, nsongwalume, ayo yo nyimbilo yami. Twajijila na kushikula. Ao ke waileshi wami. Lesu wibatuma mba banyimbile mu kimye kyo Nji kuno. Italazha mweo wami.”

<sup>156</sup> Yawama kukila byonse bintu byalubakana, awa bijimba byakala na kubuluma, kuyatu kulutwe, kechi wakonsha kuja ne mu bifulo mwavula bantu. Ke jiilo yakwa diabola. Ke nzubo yakwa diabola, byonse byalubakanatu na bubu. Anweba bonse mwatatu maana enu ku byobyoy kabiji mubena kwibyumvwa bulongo? Inge babika mali mu byobya bibokoshi bicheche byakala, kabiji ne byonse bintu byabusaji byakala byaiyapo, mwibyumvwa bulongo? Kimube buvu. Obewa wiwabwela munyuma. Obewa wafuma kwi Lesu. Obewa kechi wamuyuka Lesu ne. Inge mwamuyuka Lesu, mu lulekelo lwa mambo enu, anweba kechi mukateleka ku byobyoy byabulamo maana ne. Byafwainwa kwikala byafwa kwi obewa. Obewa—obewa wafwainwa kulasa ku bibye. Obewa kechi wibikeba ne. Jiilo yobe yawama. Obewa watemwa Lesu. Kechi mwakonsha kwiya lukeelo luno ne, fukamai kuno na baabo besolola lukeelo luno?

157 Kuno kuji banabalume ne banabakazhi bafukama kuno, awo waikala Mwinakilishitu pa myaka yavula. Amiwa kechi mbena kwibabuzha bwinakilishitu ne. Bino kyo Mbena kweseka kuuba ke kwibabuula yewa diabola, ao ubena kwibalondaizha, ubena kwibafumya ku lusekelo lwapwijijika. Aye Mupashi Wazhila ke Lusekelo. Mulongo, Nabuka natoma, Ngya pa mwanya kasa napendwa, Amiwa ngikala wapendwa juba jonse, wapendwa bufuku bonse. Oo, Amiwa na—Natemwatu ku. . . Amiwa ngya nakuloba, Amiwa jitu, “Kundeka amiwa ne, Anweba Mupulushi wabibusa. Umvwai kujila kwami.” Amiwa ngya na kwipaya nyama, kabiji ne kwimba mitotelo ya Lesa. Amiwa mbena kusapwila, Amiwa. . . konse nkongya Amiwa. Kechi ukeba kwikala muyewa musango ne? Wayulamo na Mupashi Wazhila, Kileta lutundaiko kwi obewa. Oo, ami! Mwibomvwa kasa bamba nyimbo yakala ya ndochi, wakonsha kwimba bibye:

Amiwa mbena kuya ku Ntanda ya mulaye,  
Amiwa mbena kuya ku Ntanda ya mulaye;  
Ng’anyi wakonsha kwiya kabiji ne kuya pamo  
ne amiwa?

Amiwa mbena kuya ku Ntanda ya mulaye.

Amiwa mbena kuya ku Ntanda ya mulaye,  
Amiwa mbena kuya ku Ntanda ya mulaye;  
Ng’anyi wakonsha kwiya kabiji ne kuya pamo  
ne amiwa?

Amiwa mbena kuya ku Ntanda ya mulaye.

Kimye ka Amiwa kyo kafika mu kukokolaka  
kwa peshiwa,

Ne kwikala bwapeshiwa myaka ne myaka!

Kimye ka Amiwa kyo kamona kilungi kya  
Bataata,

Kabiji na kukokoloka mu kyaji Kyanji?

Amiwa mbena kuya ku Ntanda ya mulaye,  
Amiwa mbena kuya ku Ntanda ya mulaye;  
Ng’anyi wakonsha kwiya kabiji ne kuya pamo  
ne amiwa?

Amiwa mbena kuya ku Ntanda ya mulaye.

158 Kechi mwakonsha kwiya ne, tuyenga kulutwe? Navuluka kimye pepi nobe faivi aduleendi ba mwi atweba kasa twaimana byobya byo Nabatizhilenga pa aduleendi na tweti, pa kyoka kino kimye kya mu mwaka, konka kuno ku kitulu kya mukola, kimye awa Ntaanda Wakumakya po aishile ku mukola. Aleluya! Jiwi jaambile kufuma mwi Ako, jaambile mba, “Juba jimo ukakumbanya Mamboawama mwaya ntanda monse.” Wakonsha byepi kamulanda, mucheche, kilubi nsongwalume wa kufamu wauba kyokyo byepi? Lusa lwa kwa Lesa! Amena.

159 Oo, ng’anyi wakonsha kwiya ne kuya? Bifumyaiko, tulai ku lubaji, kinemenezhi kyonse. Kechi muteleke ku yoyo mipashi

yakubepaika ne. Iyai, telekai ku Kyambo kya Lesa, ABYO BYOBYAAMBWA AYE NKAMBO! “Batokwa baumvwa nzala ne kilaka kya bololoke, mambo bakekuta.”

<sup>160</sup> Twayai tukunyike mitwe yetu byo tubena kulombela baabo baji pa kitapisho.

Batemwe baana, Nasaka namba anweba muvuluke, lukeelo luno, muji koko amba mutuule kinemenezhi ku lubaji. Anweba muji koko pakuuba mba mutule ku lubaji kinemenezhi ne bubi bupelawizha kwi mutwala mungi. Paulo waambile, mu Bahebelu, kyapitala kya bu 12.

*...byo twamona kuuba mba...twazhokolokwa na jibumba jikatampe ja batumonyi jiji byonka bino, tutaye byonse bintunemena, ne abwa bundengamambo... bupelawizha kwitukasakanya,...*

*Kabiji kikwabo kyo Nsawkamba i ki ka? mambo... kimye kechi kyakonsha...kwamba pe Gedeon ne,... akwa Balak, Balaka,...akwa Samisoni,...akwa Yafeti; akwa Davida...akwa Samwela, ne a bangauzhi:*

*Aabo kupichila mu lwitabilo bakokeshe bufumu, baubile byaoloka, ne kutambula mulaye, bashinkile tunwa twa babokwe,*

*Bazhimine bukaji bwa mujilo, bapulukile ku bui bwa mpoko, mu kunekena kwabo mwafumine bulume, ne kwaluka baalukile ke...bilobo...ne kwiapanga mazhita a bangi...*

*Kabiji banabakazhi nabo batambwile jibiji bafu babo na lusanguko...*

*Kabiji bakwabo nabo batambwile lumanamo, baesekelwe na bya mwenga ne kututaulwa,...kine kabiji, byakila pa bibye, na mfungwa ne mutuleya:*

*Kabiji—kabiji bakwabo nabo baesekelwe... baendelekelwe...bamanyikilwe...*

*...abo bonse batambwile lushimuno lwawama monka mu lwitabilo,...*

*Kabiji bano bonse, bashimwinwe bulongo mambo a lwitabilo, kechi batambwile kyalayilwe ne:*

*Lesa witumwena atweba bintu byakila kuwama, kya kuuba mba abo pabula atweba kechi balumbululwe ne.*

*Onkao mambo ne atweba netuwa...byo twazhokolokwa na jibumba jikatampe ja batumonyi jiji byonka bino, tutaye byonse bitunemena, ne abwa bundengamambo...bupelawizha kwitukasankanya, pakuuba mba tunyeme na butekanye lwendo lo betutongwela,*

*Kasa tutala konka kwi Yesu, ntangi ne kalumbulula wa lwitabilo lwetu; ye wakosejilemo mu kumanama ku musalabu mambo a lusekelo lwa mutujilwe kulutwe, ne kutako muchima ku bumvu ne, kabiji. . . waikala konka ku kuboko kwa kilujo kya jitanda ja Lesa.*

<sup>161</sup> Yesu, mu milombelo Yanji, waambile mba, “Taata, Nezhijika Amiwa mwine.” Yesu waikale wazhijikwa, ku Kipwilo. Aye wafwaijilwe kusongola, bino Aye kechi wikyubile ne. Aye wizhijikile. Aye waambile mba, “Bazhijikai, Taata, monka mu Bukine. Kyambo Kyenu bo Bukine.”

<sup>162</sup> Pano tutaye byonse bitunemena. Uzhingila bukiji nyi? Obewa uji na kintu kimo, kikulengela kwamba kimye kyo wafwainwa kubula kwamba ne? Anweba Lesa! Kibikai popo pano. Kitulai popo, talai Mujilo wa pa kitapisho eye ekifumyepo. Talai butemwe bwa Lesa bwikisoke. Talai konse kwa kwitemwa kwakala, jishinda jo wambilamo ku mukazhi obe, jishinda jo wambilamo ku mulume obe, jishinda jo wambilamba ku bena kikalankulo, jishinda jo wambilamo ku bantu mu kipwilo, kitayai pa kitapisho lukeelo luno, kabiji Mujilo wa Lesa usa kwiya na kwikifumyapo, kabiji butemwe bwa Bulesa busakusoka pa kifulo kyakyo.

<sup>163</sup> Uji na misongo? Ibikai pa kitapisho, ambai mba, “Nkambo, kiji pano. Lengai mwi amiwa mupashi watoka. Lengai mwi amiwa bulume bwa lubuko.” Monai Lesa byo akooba. Lesa usakwikyuba lukeelo luno.

<sup>164</sup> Taata Wetu Wamwiulu, twakunama mu Kyeenyi Kyenu, mu kwimenako baji pa kitapisho. Lekai lusa Lwenu lwikale pa bonse mwiabo, Taata. Pano nobe abo. . . Nkambo, Amiwa kechi nakonsha kwibobilakyo ne. Bafwainwa kwikyuba abo bene. Kafwako muntu wakonsha kwibobilakyo ne. Abo bafwainwa kwikyuba bunke. Lekai myeo yabo ponka pano yambe mwiabo bene, “Anweba Lesa, akwe kuzhingila bukiji, Amiwa ne butulatu papo, Nkambo. Amiwa kechi kekitola ne. Nangwa kikaletu byepi, Amiwa nsakwikileka kiye, kufuma pa kino kimye. Awe lujimi wami waikala wapeela kutolako lubaji na jibumba ja bayebeka, Nkambo, Nekitula papo. Amiwa kechi kekisenda jibiji ne. Zhijikai lujimi wami, Nkambo. Lekai ng’umvwe Bamalaika kasa babena kwiya, nobe byonka byaubile Isaya byo aambile mba, ‘Amiwa ne muntu wa byatunwa byabubipisho. Malwa ami!’” Kabiji Malaika wayishile, watolele kimano, kabiji wayile ku kitapisho na kutola jikala ja Mujilo, kabiji wijibikile pa mivumbo yanji ne kumuzhijika. Lesa, zhijikai yense ubena kwamba lukeelo luno, ao wamba byatama ne kuleta mabano. Kiswishai kye, Nkambo.

<sup>165</sup> Misongo yonse yakunama kuno mu kino kishimikwa, bantu bakolwa, byo twayuka mba badiabola, ne abo. Lesa, nobe kalume Wenu, Ne bapanga, mu Jizhina ja Yesu. Lekai balupuke

kufuma mu muntu yense wakolwa. Kabiji lekai muntu yense wabubipisho, uji na milanguluko ya bubi, mwenga, lukumbwa, banabalume ne banabakazhi, pamo, Lesa, bifumyaimo mwi abo. Bonse bo babena kukeba kuleka fwaka, ne kutoma kucheche, ne bijiilo bicheche, kabiji ne bintu byakwitemwa; Lesa, ntundaikai michima yabo na Mupashi Wazhila kya kuuba mba abyo bintu kechi bikekalapo na nkebelo ikwabo. Kechi bikekala na mpuzha ne; obewa wayula bingi na Mupashi Wazhila, kufumatu ponkapo.

<sup>166</sup> Lesa, lengai kikye kipwilo kicheche ke kipupu kibena kuteema. Kilengai kwikala kifulo kya Mupashi Wazhila, kilengai kikale ke Mujilo ubena kutema, pakuuba mba ntanda ikale ku lubaji ne kumona lukumo lwa Lesa. Lesa, tatwilai na jije jibumba ja bantu bacheche, abo bafika ku aduleendi lukeelo luno. Kiswishai kye, Nkambo.

<sup>167</sup> Tokeshai muchima yense, yense Methodist, yense Baptist, yense Katolika, yense Presbyterian, yense Pentekosito. Nkambo, kifumyaimo mu muchima wabo, kabiji balekai beye kwi Anweba leelo. Kiswishai kye, Taata. Ne basutwila kwi Anweba, kabiji ne bapana kwi Anweba, mu Jizhina ja Yesu Kilishitu, mu kutokeshia myeo yabo kabiji ne lubuko lwa mibiji yabo. Amena.

<sup>168</sup> Nakumya, pa kitapisho, bushe washa kisendwa kyobe nyi? Bushe mubena kumvwa nobe kyashala popa nyi? Inge ubena kumvwa mba kyashala popa, obewa yobe mutonyi. Obewa yobe ubena kulomba. Amiwa nasapwila. Obewa yobe ubena kulomba. Bushe kisendwa kyobe kyashala ponka, mulongo, nyenga? Wakonsha kine kwikisha ponkapo? Inge wakonsha, sutulako kuboko nkobe, ne kwamba mba, “Ee, Lesa, pano Amiwa nekisha kuno. Lupusano lwami, Amiwa nsakwikisha kuno ku kitapisho.” Pano ngakyo, kufikatu ne ku mpelo ya kitapisho kuno, ku kilujo kyami, inetu? Wakonsha kwikisha koko nyi? Bushe wakonsha kusha akya kisendwa kyakala popo nyi? Ambai mba, “Ee, lwitabilo lwami lubena kutala kwi Anweba, Anweba Mwanamukoko wa pa Kalvali.” Kimye kyo tubena kumwimbila pamo.

Lwitabilo lwami lubena kutala kwi Anweba,  
Anweba Mwanamukoko wa pa Kalvali,  
Anweba Mupulushi wa Bulesa;  
Pano ng’unvwai kimye kyo Mbena kulomba,  
Mfumyai kuzhatwa kwami konse,  
Anweba ndekai kufuma ku jino juba  
Ngikale Wenu yense!

<sup>169</sup> Twayai twimane, na munema yense, muntu yense. Pano telekeshai bulongo, muntu yense. Kechi nangwa umo ashalepo ne. Nobe... Mpwijilo kechi yapwa ne. Nakeba mba anweba mutambule kukwe kuzhijikwa kucheche.

Kimye bumi bwami kyo Bubena kwenda mu  
 mashinda avula afinshi,  
 Kabiji bulanda bwazhokoloka ami konse  
 konse,  
 Anweba Ikalai Ntangi wami;  
 Fumyai finshi yaluke ke juba,  
 Fumyai mipolo ya bulanda,  
 Ndekai kufuma ku jino juba  
 Ngikale Wenu yense!

Kechi mu mwimbile bomwalamakana nabo ne. Zhizhibikai meso enu, kabiji twayai tumwimbe bitende bitende, byo tubena kusutula maboko etu kwi Lesa.

Kimye bumi bwami kyo Bubena kwenda mu  
 mashinda avula afinshi,  
 Kabiji bulanda bwazhokoloka ami konse  
 konse,  
 Anweba Ikalai Ntangi wami;  
 Fumyai finshi yaluke ke juba,  
 Mfumyai bulanda bwa mipolo,  
 Nangwa kundekelela ngye mungi  
 Kufuma kwi Anweba ne.

Amiwa njina Bataata kubushiya,  
 Amiwa njina Bataata kubushiya,  
 Amiwa njina Bataata kubushiya,  
 Ku Kitulu kikwabo.

Oo, juba jimo ja lukumo Amiwa kaya na  
 kumumona Aye,  
 Juba jimo ja lukumo Amiwa kaya na  
 kumumona Aye,  
 Juba jimo ja lukumo Amiwa kaya na  
 kumumona Aye,  
 Ku Kitulu kikwabo.

Oo, juba ja lukumo kape keesha,  
 Aja juba ja lukumo kape keesha,  
 Aja juba ja lukumo kape keesha,  
 Ku Kitulu kikwabo.

<sup>170</sup> Nakumya pano, baanga baji na taata mu Ntanda ikwabo? Twayai tumone maboko enu. Baanga baji na maama mu Ntanda ikwabo? Twayai tumone maboko enu. Baanga baji na Mupulushi mu Ntanda ikwabo? Twayai tumone maboko enu.

Bushe kechi kukekala kupwila kwawama ne!  
 Bushe kechi kukekala kupwila kwawama ne!  
 Bushe kechi kukekala kupwila kwawama  
 nenyi!

Ku lubaji lukwabo. . .

<sup>171</sup> Nasaka mba anweba mubepo kintu kimo. Pano kimye kyo tubena kwimba yewo jibiji, Nasaka namba mwi imunepo na

muntu umo waimana nenu kwipi, kabiji ne kwamba mba, “Mulongo, nyenga, ndombeshopo, amba Amiwa kakukumanya mu Ntanda ikwabo.” Kwikyuba ne kana washininwa. Baanga babena kukeba kukumanya umo ne mukwabo? Baanga babena kukeba kukumanya muntu yense muno, Koko? Kine, twaketekela mba tukooba. Pano twayai twi imunepo mu maboko umo ne mukwabo, ne kwamba mba, “Nasaka kunkumana nobe, mulongo. Nasaka kunkumana nobe kulubaji lukwabo.” Pano kimye kyo tubena kwimba yuwe, “Amiwa njina Mupulushi ku bushiya.” Kijitu bulongo.

Amiwa njina Mupulushi ku bushiya,  
Amiwa njina Mupulushi ku bushiya,  
Amiwa njina Mupulushi ku bushiya,  
Ku Kitulu kikwabo.

Oo, juba jimo Amiwa kaya na kumumona Aye,  
Juba jimo ja lukumo Amiwa kaya na  
kumumona Aye,  
Juba jimo ja lukumo Amiwa kaya na  
kumumona Aye,  
Ku Kitulu kikwabo.

<sup>172</sup> Bushe kyokyo kuuba kyakulengela kumvwa bulongo ne buwame nenyi? (*Yesu, ndamai kwipi na musalabu.*)

Yesu, ndamai kwipi na . . .  
Kuji Nsulo yawama,  
Yatutu kubonse, kakola ka lubuko,  
Kufuma ku Nsulo ya Kalvali.

Muntu yense asutuleko kuboko kwanji pano.

Kalvali, kalvali,  
Katotanga myaka;  
Ne byo kafika konka  
Nakukokoloka kubushiya bwa mukola.

Kalvali, kalvali,  
Katotanga myaka;  
Ne byo kafika konka  
Nakukokoloka kubushiya bwa mukola.

Namutemwa Aye, Namutema Aye  
Mambo Aye ye mutanshi kutemwa  
Kabiji wapotele lupulukilo lwami  
Pa Kalvali.

Lutakaiko lwikale kwi Lesa!

<sup>173</sup> Twayai mu kuzhimdama tukunyike mitwe yetu. Kabiji mujishinda jetu ja butemwe, twayai tumutakaike Aye na maboko asutulwa, ne kwamba mba, “Nemusachila Anweba, Nkambo, pakupulusha mweo wami. Nemusachila Anweba, Nkambo, pa kundengela kwikala wakonsa. Nemusachila Anweba, Nkambo,



pa byonse byo Mwauba, pakuleta bupokolweshi bwawaina, pakuleta lupulukilo lwatutu. Nemusachila Anweba, Nkambo.”

Twapana kwi Anweba bupe-bwalusachilo. Twimutakaika Anweba mambo Anweba mwi babutemwe. Obewa ye Kikwibu kya Mukipachiko, Ntaanda Wakumakya, aye Loozi wa Kushaloni, ye Byonse-mu- Byonse. Anweba mwi Taata, Mwaana, aye Mupashi Wazhila; Aye Wajinga, Ye ujiko, kabiji Ye Ukeya; ye Alefwa mukatampe, Omega. Anweba mwi Umo Wakukumya, aye Mfumu wa Mutende, Muzhazhi ne Kisaka kya Davida. Anweba mwi Byonsetu! Kabiji twimusachila Anweba, Nkambo, pa byonse byo Mwauba. Twimusachila Anweba pa Kyambo Kyenu, mambo Ke Kyeya kya jishinda jetu. Oo, twalomba, Nkambo, amba Anweba musakwituleka kwenda mu Kyeya. Kiswishai kye, Taata. Mu Jizhina ja Yesu Kilishitu. Amena.

Kijitu bulongo. Mukimye kyo tubena kwikala mineti umo. (*Tukenda mu Kyeya.*)

Tukenda mu Kyeya, akya Kyeya kyawama,  
Iyai kuji miso ya kime kya lusa;  
Samai konse konse mwi atweba ma juba kabiji  
ne mu bufuku,  
Yesu, Kyeya kya . . .

<sup>174</sup> Iyai, bazhijikwa, twayai tumwimbe pano!

Tukenda mu Kyeya (kyabula biko, buzhile),  
Kyeya kyawama,  
Iyai kuji miso ya lukumo lwa kime kya lusa;  
Samai konse konse mu juba ne mu bufuku,  
Yesu, Kyeya kya pano pantanda.  
Iyai, mushimunai Aye kwikala Mfumu wenu,  
Yesu, Kyeya kya pano pantanda;  
Apo mangengele a Mwiulu po akajila,  
Yesu, Kyeya kya pano pantanda.

Muntu yense!

Twenda mu Kyeya (Kyeya kya jishinda jami),  
Kyeya kyawama,  
Iyai paji miso ya kime kya lukumo kya lusa;  
Samai konse konse mwiatweba na juba ne  
bufuku,  
Yesu, Kyeya kya pano pantanda.

<sup>175</sup> Bushe kechi kyakonsha kukulengela kumvwa bulongo nenyi? Baanga baumvwa bulongo? Sutulaikotu kuboko kwenu pano, ne kwamba mba, “Naumvwa bingi bulongo.” Mupashi Wazhila wa kuchinisha. Nanchi atweba tuka (kika?) kwenda mu Kyeya. Kechi muteleke ku...Kyeya kyo kika? “Kyambo Kyenu ye Lampi.” Nanchi:

Tukenda mu kikyeye Kyeya, ke Kyeya kyawama,  
 Kiyatu paji miso ya kime kya lusa lwa lukumo;  
 Samai konse konse mwi atweba mu juba ne  
 bufuku,  
 Yesu, ye Kyeya kya . . .

<sup>176</sup> Bino, kechi kyawama nenyi? Kyamwekatu nobe kechi  
 twakonsha kushika ne. Aye Mupashi Wazhila ubena  
 kwitukwata! Kechi mubena kumvwa byobyo nenyi? Kibena  
 kumvwanikatu nobe . . .? . . . Kyamwekatu nobe kibena kwiya.

. . . Mamboawama abena kusuma na mashi,  
 Mashi a banababwanga bafwijile pa Bukine,  
 Ao Mamboawama a Mupashi Wazhila abena  
 kusumatu na mashi.

Mutanshi kufwila lulwe lunengezho lwa  
 Mupashi Wazhila,  
 Wajinga Yoano Mubatishi, bino wafwile nobe  
 muntu;  
 Nanchi palondejile Nkambo Yesu, Aye  
 bamupopele,  
 Aye wasapwijile mba Mupashi wakonsha  
 kupulusha bantu kufuma ku bubi.

Kuji Petelo ne Paulo, kabiji ne Yoano wa  
 bulesa,  
 Bapaine bumi bwabo pakuuba mba ao  
 Mamboawama asame;  
 Bamvwangakenye mashi abo, nobe bangauzhi  
 bakala,  
 Pakuuba mba Kyambo kyakine kya Lesa  
 kyonsha kubulwa na bukishika.

Nanchi baashile mabwe Sepetena, aye  
 wasapwijile kukanya bubi,  
 Aye wibalengejile kuzhingila bingi,  
 bampopakenye mutwe wanji;  
 Bino aye wafwile mu Mupashi, aye wapaine  
 mupashi,  
 Kabiji na kusambakana na bakwabo, aya  
 zhita-ipana bumi.

Kitwajijilatu na kusuma na mashi, ee, kibena  
 kusuma na mashi,  
 Ao Mamboawama a Mupashi Wazhila abena  
 kusuma na mashi,  
 Mashi a banababwanga bafwijile pa Bukine,  
 Ao Mamboawama a Mupashi Wazhila  
 atwajijilatu kusuma na mashi.

Telekai!

Kuji myeo iji mushi ya kitapisho, ibena kujila,  
 “Papita bimye binga?”  
 Pakuuba mba Nkambo a kamanyike bauba  
 byatama;  
 Bino kukekala bavula bakapana mashi a bumi  
 bwabo  
 Mambo ao Mamboawama a Mupashi Wazhila  
 aji na mashi achila.

Akitwajijilatu na kusuma mashi, (Aleluya!)  
 abena kusuma na mashi,

Nakeba kwikala umo wa mwiabo.

. . . Mamboawama a Mupashi Wazhila, abena  
 kusuma na mashi,  
 Mashi a banababwanga bafwijile pa Bukine,  
 Ao Mamboawama a Mupashi Wazhila abena  
 kusuma na mashi.

<sup>177</sup> Nakonsha kutemwa naya pa kufuma ku pulupiti. Amena. Oo, byo kyawama! Balongo bami bapaine bumi bwa mashi abo. Kukekala bavula bakoba kintu kimo. Kechi musakamane ne. Kibena kwiya na kwimwesa katatakatu. Obewa ukatwela nangwa kulupuka. Bonse banembeshiwa ku Kije kya Bipwilo, kabiji bonse babena kutwela. Babena kupwilakena pamo.

Kabiji kuji bavula bakapana mashi a bumi  
 bwabo,  
 Mambo ao Mamboawama a Mupashi Wazhila  
 abena kutoksha.

Abena kusuma na mashi, ee, abena kusuma . . .  
 (Oo, aleluya!)  
 Ao Mamboawama a Mupashi Wazhila abena  
 kusuma na mashi,  
 Mashi a banababwanga bafwijile pa Bukine,  
 Ao Mamboawama a Mupashi Wazhila, abena  
 kusuma na mashi.

<sup>178</sup> Ami! Naumvwa nobe Kushikulwa kuji peulu ya kipwilo. Oo, kyandengela amiwa kumvwa bingi bulongo! Bubi bonse baji mushi ya Mashi. Mwamona, aye Mupashi Wazhila watemwa Kyambo. Akyo Kyambo ko kajo ka Mupashi Wazhila, mwamona. Oo, ami! Kiya ne kutwela mu bantu, komvwa bubi bwabo, kubuka bikola byabo, kisenda byubilo byabo kwalepa. Pano Amiwa napendwa, napendwa byonka byo Nakonsha kwikala, napendwa na Mupashi, butemwe kulupuka mu muchima wami. Nangwatu muntu obe kyamusango ka, kyalekelwa. Mulwanyi obe wakine, kypawa. Muntu yense waambapo kintu kimo, inge Na . . . kyawama, Na . . . byonse byaya, byatokeshiwa pano.

Kabiji kibena kusuma na mashi, ee, kibena  
 kusuma na mashi,  
 Ao Mamboawama a Mupashi Wazhila abena  
 kusuma na mashi,  
 Mashi a banababwanga bafwijile pa Bukine,  
 Ao Mamboawama a Mupashi Wazhila . . .

Oo, ami! Byo kyaikala kyawama!

Ke kimye kyawama bingi kwi anweba,  
 Ke kimye kyawama bingi kwi amiwa;  
 Inge atweba bonse twinengezha kukumanya  
 Yesu Mfumu wetu,  
 Kikekala kimye kyawama bingi.

Kimye kyenu kyawama,  
 Ke kimye kyawama bingi kwi amiwa;  
 Inge atweba bonse twinengezha ku kumanya  
 Yesu Mfumu wetu,  
 Kikekala kimye kyawama bingi.

Anweba mwatemwa kyokyo? Muntu yense, twyai!

Oo, kimye kyawama bingi kwi anweba,  
 Ke kimye kyawama bingi kwi amiwa;  
 Inge atweba bonse twinengezha kukumanya  
 Yesu Mfumu wetu,  
 Kikekala ke kimye kyawama bingi.

<sup>179</sup> Mbena kumvwa nobe musango-wakala wa kusangululwa uji mu kipwilo. Kechi ibyo nenyi? Ke komvwewa kwa musango wakala, kuchinisha; kyawama, kimye kyawama kyakala. Kechi mubena kumvwa buwame nenyi? Oo!

Amiwa kamutota Aye, Amiwa kamutota Aye,  
 Mutotai Mwanamukoko waipailwe na mambo  
 a babi;

Twyai tumwimbe pano, muntu yense. Anweba mwamuyuka nyi? Amiwa na muyuka. Iya kuno; kwasheko kutangijila, Mulongo Neville. Kabiji anweba bonse, pano, sutulaikotu maboko etu, mwimbai na pano, pano, inge mwakonsha.

Mutotai Mwanamukoko waipailwe na mambo  
 a babi;  
 Mupai Aye lukumo, anweba bantu bonse,  
 Mambo Mashi Aji aomvwa kiko kyonse.

<sup>180</sup> Pano, muntu yense, iyai!

Amiwa kamutota Aye, Amiwa kamutota Aye,  
 Mutotai Mwanamukoko waipailwe na mambo  
 a babi;  
 Mupai Aye lukumo anweba bantu bonse,  
 Mambo Mashi Aji aomvwa kiko kyonse.

Amena. Akyo kyawama bingi?

... Muzhi Wasakwa itoka,  
 Amiwa njina mwingilo, kyasa, kabiji ne  
 muchinya;  
 Pano Mbena kupembelela, na kutala kabiji na  
 kulomba,  
 Mambo Muzhi utoka Yoano wamumwene kasa  
 ekila panshi.

<sup>181</sup> Amena. Wakukumya! Oo! Pano twayai twimane, muntu yense. Naketekela mba mubena kumvwa bulongo. Vulukai kupwila bufuku buno. Pano twasaka kwimba lwimbo wetu wawama wakala wa kupalang'anya bantu.

Pa Jizhina ja Yesu nakufukama,  
 Kupona kikuvumene ku maulu Anji,  
 Mfumu wa bamfumu Mwiulu tukamuvwika  
 Aye,  
 Kimye lweendo lwetu byo lukapwa.

Kijitu bulongo. Muntu yense pano, bonse pamo. Kijitu bulongo.

Pa Jizhina ja Yesu nakufukama,  
 Kupona kikuvumene ku maulu Anji,  
 Mfumu wa bamfumu Mwiulu tukamuvwika,  
 Kimye lweendo lwetu byo lukapwa.

Jizhina Jawama, (Jizhina Jawama!) Byo  
 janemesha! (Byo jawamisha!)  
 Luketekelo lwa ntanda ne lusekelo lwa  
 Mwiulu;

Jizhina Jawama, (Jizhina Jawama!) Byo  
 janemesha! (Byo jawamisha!)  
 Luketekelo lwa ntanda ne lusekelo lwa  
 Mwiulu.

<sup>182</sup> Ke lukeelo lwawama bingi! Ke kimye kyawama bingi! Twayai tukunyike mitwe yetu pa kakimyetu kacheche. Muntu yense ataletu kwi Kilishitu ponkapano, Mupulushi wenu. Mu jishinda jazhindama, Nasaka anweba kumupa lusachilo ne lutakaiko. Kwaamba mba, "Nkambo, Amiwa ne musachila Anweba pa kuzhijika mweo wami. Amiwa ne musachila Anweba pa byonse byo Mwangubila. Lekai Mupashi Wenu ekale pe amiwa mu juba jonse, Nkambo. Ntangijilai. Mbulwe mwakuya. Mpeshai." Lesa swishai aa mapesho kwi anweba, yo milombelo yami.

Pano kimye kyo twakunyika mitwe yetu, Mulongo Neville, tupalang'anye na milombelo.



*MIPASHI YAKUBEPAIKA* KDE55-0724  
(Enticing Spirits)

LUFUNJISHO LWA PA BADEMONA LWALONDAKANA

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, 24 Makumbikumbi, 1955, pa Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaana, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)